





大明仁孝皇后勸善書卷之十

嘉言

○**儒**吾每讀聖賢書。未嘗不肅敬對之。其故紙有五經詞義及聖賢姓名。不敢他用也。○借人典籍。皆須愛護。凡有缺壞。就為補治。此亦士大夫百行之一也。○讀書起家之本。循理保家之本。

○**釋**若有衆生。聞是觀世音菩薩品自在之業。普門示現神通力者。當知是人功德不少。○呪是三世諸佛所說。若能至心受持。無不靈驗。○受持讀誦陀羅尼者。能成就八萬種吉祥事。能除滅八萬種不吉祥事。○一切業障。海皆從妄想生。若欲懺悔者。端坐念實相。衆罪如霜露。慧日能消除。

○**道**敬奉三寶。口誦尊經。一切莊嚴。真法智慧。不可思議。○能依吾教者。供養轉經。魔鬼消除。九幽息對。見存獲慶。天下太平。○持此真文者。外伏魔精。內安真性。功霑水陸。善及存亡。○敷演教法。啓方便說。而為接引。當得福報。同證無為。○好學至經。功德滿就。皆得神仙。

感應

宋王文正公曾。父平昔見故紙遺墜。必掇拾洗以香水。收之。一夕夢宣聖拊其背曰。汝何敬重吾字之勤也。恨汝老矣。無可成就。他日當令曾參來汝家受生。顯大門戶。時曾母有孕。及期。因得此夢。次日果生一男。遂命名為曾。後狀元及第。此則敬重聖賢字紙之報也。

宋饒州德興縣常豐村士人董性之母李氏。淳熙十二年五月。苦腹疾。是時村墅間多嬰此患。李疾勢日進。七月九日夜半。氣息不續。家人相守涕泣。棺斂衾衾悉已辦治。天時正暑。須臾即就木。翌日卯刻。微若欠伸。扶起坐。乃言曰。吾殆落冥境。初行平陸曠野數里許。入大城。聞人聲嘈嘈。而眼界絕闇。一無所覩。自分必死矣。以口語心曰。吾受持觀音普門品經。凡三十年。未嘗少懈。今一旦入鬼錄。佛如有靈。不無覲幸。於是大聲疾呼。救苦觀世音菩薩。僅百聲。恍然若有以右手把吾左臂而偕行者。纔三十餘步。漸覺光明如晝。乃一婦人。瓔珞被體。璀璨照耀。香氣芬郁。相好端嚴。吾知為菩薩示現。告使救命。應曰。爾數已盡。緣善根素具。故來相援。宜急歸。勿留。更半紀復相見。吾方作禮敬謝。則舉步愈高。相距愈遠。指西方而去。遙

望幡蓋導前。金碧輝晃。使人蕩心駭目。旋如夢覺。不知身之卧此榻也。自是康樂安平。後五歲。紹熙元年八月十七日無疾坐逝。性之自爲文記其事。

宋淳熙末。建昌走卒楊亮病。見兩吏持符追已。且索錢。亮怒曰。彼此是公人。如何從我乞覓。若要去。只今便行。遽隨之以出。俄到官府。王者問生時有何功德。對曰。身供趨走之役。每遇差使。不敢違程限。又曰。不問此事。別有何陰騭。亮始悟爲冥司。曰。但念得觀世音經。又問更有何善事。對曰。小人那得一善可稱。但知守本分。不害人耳。王者命檢籍。如所言。遂云。汝未合死。放汝還。亮得釋。歡喜奔歸。蹶然而寤。已在棺中。死兩日矣。既沐浴着衣。以製孝服未辦。故就木待之。適聞有聲。急來看。則見欠伸如熟睡。方醒者。掖起坐。汗流如洗。移時履地復常。年過七十。

元江陵府周道人好善。常持誦觀音經甚虔。至元壬午冬。與衆相約欲往他郡。未行間。忽見門外有一鸚鵡作聲喚曰。莫要去。莫要去。似有再三丁寧之意。其人省悟。莫是觀音臺上個顯靈報我。遂不敢行。他人不信而往。

者中途遇盜盡被劫殺獨此人獲免。

宋王球字叔達太原人爲涪陵太守以元嘉九年於郡失守繫在刑獄防鑲堅固球先精進爲善至獄中百餘人並多飢餓球每食皆分施之日自持齋至心念觀世音夜夢升高座見一沙門以一卷經與之題云光明按行品并諸菩薩名球得而披讀忘第一菩薩名第二觀世音第三大勢至又見一車輪沙門曰此五道輪也既覺鑲皆斷脫球心知神力彌增專志因自釘治其鑲經三日而被原宥

宋彭子喬者益陽縣人也任本郡主簿事太守沈文龍孝建元年以罪被繫子喬少年嘗出家還俗後長誦觀世音經時文龍盛怒防械稍急必欲殺之子喬憂懼無復餘事唯至誠誦經至百餘遍疲而晝寢同繫者有十許人亦俱睡有湘西縣吏杜道榮亦繫在獄乍寐乍寤不甚得熟忽有双白鶴集子喬屏風上有頃一鶴下至子喬側時復覺如美艷人道榮起見子喬双械脫在脚外而械痕猶在焉道榮驚視子喬亦寤共視械咤問道榮曰有所夢不荅曰不夢道榮以所見說之子喬雖知尚慮獄家疑其

欲叛。乃取械着脚。經四五日而蒙釋放。

隋開皇初。有揚州僧。忘其本名。誦通涅槃。自矜爲業。岐州東山下村中沙彌。華言誦觀世音經。二僧俱暴死。同至閻羅王所。乃慶沙彌金高座。甚恭敬之。慶涅槃僧銀高座。敬心稍惰。僧情大快快。問沙彌住處。既蘇。從南來至岐州。訪得沙彌。具問所由。沙彌云。每誦觀音。於別所衣淨衣。燒名香。呪願。然後乃誦。斯法不息。更無他術。彼謝曰。吾罪深矣。所誦涅槃威儀不整。身口不淨。於斯驗矣。

宋慧和沙門者。京師衆造寺僧也。元嘉之難。和猶爲白衣。屬劉胡部下。胡嘗遣將士數十人作謀。東下。和亦預行。行至鵲渚。而值臺軍西上。謀衆離散。各逃草澤。和竄下至新林。見野老衣服縷弊。和乃以所衣袴褶易其衣。提籃負擔。若類田人。時諸遊軍捕此散謀。視和形色疑而問之。和荅對謬畧。因被笞掠。尋將見斬。和自發心。便恒誦念觀世音經。至將斬時。祈懇弥至。而軍人揮刃屢跌。三舉三折。並驚而釋之。和於是出家。遂成精業。

宋江陵薛觀音奴。平生敬事觀音。故得此名。每日早必莊誦觀音經一二

卷雖有事不廢。忽其妻病百藥不愈。薛誦經祈靈。益虔。妻忽夜夢一白衣婦人來曰。汝病乃宿業所致。吾以汝夫虔懇。故來相救。即於瓶中取藥少許飲之。因忽不見。及覺。口中異香不絕。自是頓愈。

宋元嘉初。有黃龍沙門曇無竭者。誦觀世音經。淨脩苦行。與諸徒屬二十五人往尋佛國。備經艱險。既達天竺舍衛。路逢山象一群。竭齋經誦。稱名歸命。有獅子從林中出。象驚奔走。後有野牛一群。鳴吼而來。將欲加害。竭又如初歸命誦經。忽有大鷲飛來。牛便驚散。遂乃得免。

晉沙門釋開達。隆安二年登隴採甘草。為羌所執。時年大飢。羌胡相噉。乃置達柵中。將食之。先在柵者十有餘人。羌日夕烹之。唯達尚存。達被執。便潛念觀世音經。不懈于心。及明日當見噉。其晨始曙。忽有大虎遙逼群羌。奮怒號吼。羌各駭怖。迸走。虎乃前嚙柵木。得成小缺。可容人過。達初見虎。嚙柵。必謂見害。既柵穿而不入。心疑其異。知是觀世音力。計度諸羌未應便及。即穿柵逃走。夜行晝伏。遂得免脫。

晉沙門釋道泰。常山衡唐精舍僧也。義熙中。嘗夢人云。君之年命當終六

七。泰年至四十二。便遇篤病。慮必不濟。悉以衣鉢之資。厚爲福施。又歸誠屬念。稱誦觀世音。晝夜四日。勤心不替。時所坐牀前垂帷。忽於帷下見人跨戶而入。足趺金色。光明照屋。泰乃褰帷遽視。奄然而滅。驚欣交萃。因大流汗。即覺體輕。所患平差。

隋沙門釋法智。爲白衣時。嘗獨行。乃至大澤中。忽遇猛火。四方俱起。走路已絕。便至心禮誦觀世音。俄然火過。一澤之草。無有遺莖者。唯法智所處容身不燒。始乃敬奉大法。後爲姚興將從征索虜。軍退失馬。落在園裏。乃隱溝邊荆棘叢中。得蔽其頭。復念觀世音。心甚勤至。隔溝人遙笑。後軍指令殺之。而軍過。搜覓輒無見者。遂得免濟。後遂出家爲淨國寺僧。一心念佛。一日謂衆曰。吾生淨土矣。忽安坐牀上而化。有金光自西來。冉冉迎去。晉呂竦。字茂高。兗州人也。寓居始豐。其縣南溪流急。岸峭迴曲如縈。又多巨石。白日行者猶懷危懼。竦自說其父嘗行溪中。去家十里許。日向暮。大風雨晦冥如漆。不復知東西。自分覆溺。唯歸心觀世音。且誦且念。須臾有火光來岸。如人捉炬者。常在前導。去船十餘步。照見溪中了了。徑得歸家。

火忽不見。

宋政和七年。秀州魏塘鎮李八叔者。患大風三年。百藥不驗。忽有遊僧來。與藥一粒令服。李漫留之。語家人曰。我三年間。化主留藥多矣。何嘗有效。不肯服。初。李生未病時。誦大悲觀音菩薩滿三藏。是夜夢所患藥僧告曰。汝尚肯三藏價誦我。却不肯服我藥。既寤。即取服之。凡七日。徧身皮如脫去。鬚眉皆再生。

唐三藏玄奘法師。西域取經。行至漠賀延沙河。無復水草。忽失手翻却水袋。千里之資。一朝罄盡。三藏唯專念觀音。夢見一大神。謂曰。何不強行。何在此卧。忽然驚寤。遂前進行十里餘。其馬忽然異路而去。到一地。甘水澄清。遂就池飲。得存性命。玄奘尤明法華正典。日誦七遍。嘗於靜室聲誦。感天人下聽。齋講之時。禎祥合沓。

宋主氏女者。徽之姪也。父兄俱入關。徽之時在翰林。王氏與所生母劉氏。及嫡母裴氏。寓居常州義興縣湖洑渚桂岩山。與洞靈觀相近。王氏自幼不食酒肉。攻詞翰。善琴。好無為清靜之道。及長。誓志不嫁。常持大洞三十

九章真經。道德章句。戶室之間時有異香氣。父母敬異之。一旦微疾。裴與劉爲於洞靈脩齋祈福。是日稍愈。亦同詣洞靈。歷像前焚香冥祝。及晚歸。坐於門右片石之上。題絕句曰。翫水登山無足時。諸仙頻下聽琴詩。此心不戀居人世。唯見天邊雙鶴飛。是夕奄然而終。及明有雙鶴栖于庭樹。有仙樂盈空。異香滿室。遠近驚異。奔共觀之。鄰人以事白於湖沱鎮鎮吏。詳驗。鶴已飛去。因因所報者裴及劉焚香告之曰。汝若得道。却爲降鶴以雪鄰人。勿使其濫獲罪也。良久雙鶴降于庭。旬日葬于桂巖之下。棺輕。但香氣異常。發棺視之。唯衣履而已。今以桂巖爲道室。

唐時陳瓌。會稽人。擢第入金門。尋釋褐。任長城尉。自少誦玉皇經。每至厄難。多獲護佑。至開元中。自會稽江行之東陽。大雨。與二十餘船同發。乘風挂帆。頃更天色昏黑。風勢益壯。至界石竇上。水湧波擊。前二十餘船皆壞。瓌急念此經。中流忽有一物如赤龍。橫出扶舟。因得達岸。俱得活。

魏銀山老人。饒州人。所居採銀戶逾萬。俱是草屋。延和中。天火發。屋皆燼。老人所居。其火不及。時州牧問老人有何術法。荅云。奉道年深。日誦玉皇

經不闕。時救火者亦隱隱見神人在老人屋上。如防護者。

隋慕容文遠。病亡七日。欲殮。忽縮一足。遂蘇。云。被一人追入一城。見王者問卿在生有何功德。文遠荅貧家無力可脩功德。惟一心念玉皇經。王稱善曰。此經欲得聞之。遂延文遠上殿。設一金牀。令誦經。忽有玉女頂翠鳳冠。服紫霞衣。手指文遠陽間所誦經本。露布其前。令分明讀誦畢。忽不見。出門唯有追吏隨行。登一高山。見城郭極高峻。烟火接天。黑氣溢地。哀叫之聲。不忍聞。叩頭求去。使者乃引回家。見形卧牀。鬼吏自後推之。忽然復活。

唐竇德玄。麟德中。為奉使過揚州。渡淮船見一人形慘悴。引一小童坐地上。德玄曰。天晚別無船來。何不同行。遂至中流。見本人有飢色。與食濟之。達岸。德玄上馬。同行十里許。問君欲何往。荅曰。我非人。乃東嶽君使往揚州。追奉使竇德玄。德玄驚怖。下馬拜曰。我即是德玄。涕泗請計。鬼甚愧。云。公容載。設食濟急。奈何。汝急誦玉皇經一百部。當來相報。德玄曰。世無本。鬼使曰。鉢州靈仙觀道士尹嗣玄有正本。可急索誦。言訖不見。德玄遂回。

令人求經本。晝夜不斷讀誦經一百部。因晝卧夢見前鬼使來喚至一城殿門外。使曰。且立此。當白王。既入。德玄於外遙聞王怒云。爾何故漏泄吾事。爲他作計。令左右驅決其使。使出。袒以示曰。此乃爲公致此。引入見王。問曰。公有大功德。筭未盡。人間秩滿當生天界。召使送回。德玄問使者云。我將來官爵如何。荅曰。汝從此可改殿中監。六十四至左相。言訖辭去。後果如其言。

唐呂文展。開元三年任閬州。信道誦王皇經萬卷。年衰牙落。向經懇請。牙復生如舊。時天旱。刺史令祈雨。誦經一遍。隨獲霽然。又苦霖潦。爲別駕韋嶽祈晴。立齋。又一夜誦此經。見屋內光明如晝。有王者數人與諸仙衆。長跪合掌。禮拜稱善。文展大驚。下座回禮。云。文展無道法。得聖賢如此恭敬。罪當萬死。王者云。我等皆天人魔王。適向諸天見此人間有光照燭。故尋光化身下降。云珍重而去。

宋臨安劉光家大富。無嗣。有貧道人以王皇經來賣。需直百千。光謂價高。道人笑而去。數日復來曰。公心慕經。不宜吝直。光悟。以直授之。道人忽不

見光夫婦恭敬受持。是歲生一子。長而敏慧。年十八登第。官至朝奉郎。後以經本鐫石。

宋吉州城內胡汝賢。於咸淳壬申臘月始。每旦禮誦經誥薦先世。祈後嗣。纔及一月。夢其父語之。云已生天矣。次夢道士選宗子立繼。未幾妻歐陽氏。又夢道士抱付嬰孩受之。而覺。隨獲有娠。於癸酉十月八日誕生一子。自此受持不懈。歲施此經。又值革運。兵疫盛行。汝賢親覩靈光大現。於是全家獲慶。

元。江西瑞州郃夢虎。至大四年辛亥三月初十日。葬母。又於丙辰年。葬父。偶值交逢節氣。陰雨不止。誠恐行車不便。哀悼不已。發心許誦玉皇經。雨果立止。晴光普照。其時葬畢。又復大雨。前後感應。不可盡述。當有善信張法興。信此孝感。命工共鋟斯經。以廣傳施。

唐子季回。舉進士科。元和八年不第。將歸。有道士勸云。秀才欲及第。何不持誦玉皇本行集經。終日與季回同步言語。忽失其人。季回遂神其事。後歸。遂求本遇御史大夫安儼之得之。日課一部。因春暇日。詣村大醉。欲還。

家至王橋店不敢進。遂宿店下。是夜月明如晝。閑步月下。見一婦人顏色甚奇。因與言語。遂被誘去。行十餘里。至一村舍。戲笑甚喧。遂入升堂。見五六人皆女人。李回自念村舍安得有此絕世之色。遂心中疑其是妖鬼。乃默誦王皇本行集經。忽有異光從口出。羣女急忙驚駭奔走。但聞腥臊之氣。蓋狐狸之宅也。視之榛棘滿目。李回茫然不知所適。俄有白鹿。色逾雪霜。前行以導。李回其口出光。鮮奪月色。逡巡達於本家。深感經力。勤誦不替。

唐任自信。嘉定府人。進士下第。乃闔扉高卧。不求仕進。常持王皇經。潔白無點。貞元十五年往湖南幹事。見洞庭湖左有龍王廟。宮殿樓閣極其壯麗。自信將入其廟觀覽。有人止之曰。幸公無往。其神躁暴。不可輒犯。每春秋二賽。祭必三牲。如其祭祀不謹。則迅雷烈風雨雹暴降。損人居止。牛羊苗稼。昔有人寓止其處。屢為霹靂所震。人皆畏其威靈。莫有敢犯者。自信謂曰。吾受三天淨戒。持始青妙典。奉行正教。以信待神。神果有靈。必應報我也。言訖乃入廟內。徘徊廊廡。登陟臺宇。是夕月朗天清。風蕭蕭起戶外。

江水拍岸。天籟響林。自信乃於殿之西楹。誦王皇經。其夜約三鼓間。暴雨驟來。霹靂震地。自信乃安神定思。閉目誦經。俄而神風靜默。雲洞無烟。徐聞絲竹嘹亮。車馬駢闐。有人傳呼。龍王至。次有赭袍金冠者。乘輿而來。見自信乃下輿趨揖。自信欲拜。王遽止之。謂曰。公久叨道蔭。不可思議。未審叅脩何典。有此利益。自信曰。自少以來。雖旦夕常持王皇經。而功勤未著耳。王即稱善。遂請自信同往。不三五里。乃抵一城。王闕瑤池。瓊樓紫閣。寶樹奇花。羅列亭臺。王乃下輿。辭自信入宮。少頃。美人數輩。昇一高座。上施碧几。其座皆七寶裝飾。又有美人數輩。持毛錦地衣。次第陳設。須臾。王出。命自信昇高座。少頃。王后太子諸妃公主皆至。圍圍四座。王乃啓請自信誦經。自信乃閉目合掌。誦經數遍。王引自信復入一殿中。設筵會訖。須臾出金銀寶珠。莫可名數。羅列于殿廡之下。以遺自信。不受。云。自信欲有所言。願王聽納。則勝於得寶矣。王云。願承教命。自信云。大王恃神威靈。少不如意。則雨雹暴降。壞人居止。牛羊苗稼。春秋二祭。稍有不謹。降罰於民。何也。願王恤念黔庶。使無枉橫之虞。此臣所以勝得寶矣。王曰。敬承命矣。幸

先生復為誠鄉人。而今而後。無險詖其心。不孝不悌。不仁不義。以強凌弱。以衆暴寡。掩是傳非。不敬天地。穢慢神祇。專行凶道。敗人成功。誠能改是。則雖清香淨水。瞻敬廟下。吾助其福。如其不然。雖祭以牲牢。吾不享焉。自信乃辭謝王。王及諸貴戚。乃送自信出宮。人見自信凌波而出者。人大驚異。自信乃集村落人衆。為傳王意。村人聞之大神其事。因請所誦之經。自信乃親為傳寫付之。及至家。家人大驚。云十日前有十餘人。荷擔珠玉金銀。送至予家。後自信遂隱入青城山。莫知所在。

唐陳國竇公夫人。姓豆盧氏。為公寬之姊也。夫人達罪福。常持誦玉皇本行集經。忽一日。夫人誦經未遍。而故疾發作。至半夜未愈。夫人自念。僕病不救。乃不能終經。遂欲起誦經。令婢燃燈。而火悉已滅。婢空回。白無火。夫人乃自歎恨。俄頃。三清堂內煌煌有燭炬出。漸升堂堦。直入卧內。去地三尺許。無人執。夫人大神其事。驚喜。取經誦之。頃失所苦。家人鑽燧得火。燭光即滅。夫人自此尤更精心。不茹葷血。日持五部。率以為常。後芮公病欲垂死。夫人前往看問。公語夫人曰。吾姊以誦經之報。壽得百歲。生好處也。

夫人問其故。云司命昨日諭我。夫人當授紫陽公主。人間二紀滿。當往矣。我亦陰授天曹長笈官。後夫人壽九十有五。無疾而終。已前七日。隣人並聞異香馥郁。將薨於堂上。聞仙樂繁會。及出葬。靈柩前有仙鶴飛翔導引。自爾有鶴結巢於墳上。時冬月。守墳者於墓側常得異花。豈非為道之善報耶。

唐元和十四年己亥歲。朝請大夫兼通事舍人張承福。及靈仙觀道士李道真。皆受持玉皇經。後承福病。為冥司所追。惟至誠密誦是經。所追鬼吏悉皆不見。後病愈。竟享長壽。

隋大業七年。趙居易常持玉皇經。未識戒葷酒。忽一日暴卒。三日復活。云初見二鬼抱文牒。追至一城門。頗嚴峻。入行五六里。見宮殿神衛甚衆。王當殿坐。或僧或尼。及四夷人。不可勝數。皆東西立。使者令居易最後立。王一一問在生作何善果。仍唱居易名。問曰。在生有何善。居易對曰。自少來持誦玉皇經。王敬起。合掌曰。君功德甚大。最為第一。雖限盡。以持經故。當為申延。又曰。諸罪中。殺生最重。君以猪羊充庖。如何。即以長釘五枚。釘居

易舌及頭手足。每下一釘。金光罩體。遂不復釘。及有一長安人高純。稱是僕射高潁之孫。王曰。汝曾誹謗大道。令左右拔舌以犁。俄舌上有光高二丈餘。亦無所傷。王加嘆訝。問記掌福善童子。云。此人有善在福簿否。曰有。此人曾在黃童觀帳設處。看玉皇經一卷。偶然而讀也。大有至誠。不敢忽略。况專心奉持乎。王即指揮鬼吏。速送二人出。少頃與高純二人一時出門。行十餘里。與高分路而去。魂既返。居易遣人持書訪其家驗之。彼家云。近已死還魂。遂捨家入道矣。居易以此事持。更不敢食肉。後因公事至驛。忽有一青衣女子求哀。試問飢有何物可食。吏云。見欲脩一肥羊甚嫩。詰之乃青荊也。居易曰。我不食肉。遽贖放之。

晉劉曄者。河北相州人也。世以開食店爲業。一日病亟。於甲辰歲秋季望日。有青衣吏持東嶽牒來追。曄哀告。願與家屬訣別。青衣不許。驅之入城角東去。行荒野中。日色慘淡。如深秋日落時也。約行數十里。聞聞道聲。追吏曰。五道將軍巡四世界。遂引曄入大林中避之。林中有廟。曰舞陽侯廟。乃樊陽侯也俄見高車朝服入廟。廟神皆起。曄問追吏曰。爲誰。吏曰。三國

譙大監滿曰。既為樊將軍廟。譙大監何以居之。吏曰。樊將軍今在北方。真武位下。充都點檢。大監奉命守此。語未竟。忽見一人戴花擔酒從東來。見滿而揖。乃滿隣家子。忘記姓名。握手號泣。問曰。我家人安否。又問劉滿。汝從何來。汝死矣。滿曰。吾不知死。但此吏追至。滿復問戴花人。見在何處。曰。吾充炳靈公下執事。甚逸。奉命送酒。譙大監汝待我於此。仍祝青衣曰。少留。既送酒至廟中。復出。問滿曰。汝在世積何善事。作何善果。我當為汝言。滿曰。懃謝北極。未嘗闕也。戴花人云。此亦善事也。吾先往為汝圖之。遂疾馳而去。青衣推劉滿行。行百餘里。見一土山。過山見宮闕嚴盛。守禦人物皆鬼狀。如世所畫地獄也。青衣坐劉滿于門等候。須臾戴花人復出。告滿曰。吾為汝問吏。言汝所殺物命來索償。其辭甚冤。奈何奈何。吾有一事。汝能皈依玉皇大天尊玄穹高上帝。至心稱念聖號。庶幾有濟。門開。劉滿隨衆而入。至殿中。見蠻夷道俗無所不有。鵝鴨猪羊。見劉滿來。皆怒目人言。曰。還我命來。劉滿怖畏恐懼。忘記聖號。正徬徨間。見殿之東角。有青衣童子持一幡。上有金書字曰。玉皇大天尊玄穹高上帝。劉滿乃記戴花人教。

念者連呼數聲。忽口中有紅光出。鵝鴨猪羊之類盡皆從光中昇空而去。繼見黃雲蓋庭。有一青衣童子持王帝誥命而下。仙官吏從跪授。列班如州縣捧讀赦文之儀。宣示於衆。滿但記云。劉滿殺生之罪。既能懺悔。可還其本壽。王及官吏再拜。青衣復去。王謂滿曰。汝當還矣。滿因請問世人作何善事可免此來。王曰。凡道釋經所載地獄報應。一一不誣。汝歸說與世人。孝於父母。忠於君王。奉行禁戒。讀誦聖號。不殺物命。不毀五穀。不從此來。滿拜謝欲出。有紫衣吏告王曰。劉滿既當還。當令見昔時造業之物。乃可放去。王許之。吏即付一卒押送。從殿西下。滿隨之。過廊廡數間。面北小殿。有官正坐。座後有一門。其卒驅滿扣門曰。罪人來。其門開。獄卒撮滿入。見一池內。穀米肉麪魚羊無所不有。臭穢不可近。獄主曰。汝認得否。劉滿曰。然。既是作業。自合食盡。方還。滿復念聖號。口吐紅光。將穢物皆燒盡。獄卒合掌嗟嘆。領滿復出告官。復付青衣。青衣相慶。忻賀言。汝自歸。無忘我可以錢財贖我。滿許之。行數十里。望見相州城下。濠水清淺。劉滿行觀。青衣推在水中。即覺。見妻孥環坐相哭曰。汝已死七日矣。滿急呼家人取紙。

幣荅謝青衣。既安。捨宅為觀。傾家資。塑造玉帝聖像。誦號不輟。及出家為道士。奉香火。妻孥為女冠云。

唐長慶三年四月中旬。前奉天縣尉馬敬。任滿歸蒲坂。住東石子坊。平日惟持誦玉皇本行集經。及一十五年。不惰慢。及到蒲坂。經數月。忽然見一神人披甲。狀貌甚異。謂敬曰。爾既精心持此真經。何不詣延康宮東道堂訪一持念女冠李霞卿。彼人姓名已係仙籍。秘藏此玉皇經本。持誦之功尤倍常。言訖不見。敬驚馬慄。汗流透衣。至旦乃詣延康宮。試為尋訪。姓李名霞卿者。果符神人所言。得遇霞卿。乃令童子入通。少遲霞卿出。有瓊表玉質。出世之姿。脩眉俊目。有不可犯之色。所謂真神仙人也。既按坐。而乃問馬敬曰。有何事相覓。乃話及神人所言之事。霞卿曰。大奇大奇。密持是經已多年。無人得知。少府既蒙神人指示。霞卿焉敢隱情。乃命小師出匣取至。乃跪而受之。將歸。勘舊所持經本。方知文句脫畧。即依法脩行新經本。其神驗頗異。無不感應。

宋李壽。荊州宜春縣人。先任江州德化縣丞。初無子。虔心禱祈。受持諸經。

呪於玉皇經尤極究心晝夜念誦三年獲生二子端平中官于成都北兵破蜀惟鑄全家獲免與經俱存舟行往返驚灘巨浪若履平地遂鋟經本傳於東南

唐陸康成嘗任京兆府法曹掾平日處性不避強禦忽一日坐廳見亡者故吏抱一案牘約數百紙請押問曰汝已去世何由來此吏曰此陰府文簿康成視之即見人姓名而已殊無他事吏曰此皆是來年兵死者問曰得無我乎吏曰有吏檢示之康成大駭曰君乃舊吏得無情乎吏曰故以此報明公爾惟玉皇本行集經可託言訖遂不見康成乃求經日誦不輟明年朱泚果叛迫陸康成為御史康成乃叱泚曰賊臣敢亂唐室而污國士耶泚大怒令數十騎圍而射之康成遂閉目持誦玉皇本行集經竟無所傷泚曰儒者以忠信為甲冑信矣乃遂釋而去之康成遂隱入終南山不仕

宋乾德中兗州節度使崔尚書法令嚴峻治軍有法有一衙校宋懿衙參不前崔怒命斬轅門外時懿顏色不改變衆咸驚異是夕三鼓已來懿復

還家。妻子見之驚駭。疑為鬼矣。宋曰。我初就戮時。一如醉睡。無諸痛苦。至今方醒。身卧衙門。因以歸家。妻子聞之。半驚半喜。候遲明。宋懿入謝。在衙軍吏無不驚駭。及尚書見。亦驚惶曰。汝有何妖術。能致不死耶。宋曰。素無妖術。然自幼專持誦玉皇經。日誦一部。昨因家人失曉。為誦經愴惶。所以衙參過期。崔問記得斬時否。荅云。初推到戟門外。即如醉夢。皆不得知。又問所誦之經在何處。云在家。急令取至。鎖鑰如故。即開鎖取經。經已為兩段矣。崔大驚。亦自悔責。遂安慰宋懿。賜衣一襲。即降錢命工寫金字玉皇經一百部。永充供養。又於本州乾寧觀門畫宋懿衙門處。斬不死。并經文作兩段之事。以警世人。信向大道之驗。

昔東梓州郾縣居民陳文達。一生誦玉皇經。發心為先妣誦及數萬遍。屢獲吉祥靈瑞之報。人亦見之。以為常。又其隣里親舊民庶。凡有危惡疾患。文達躬往誦經。則患者立愈。

唐開元中。盧重誨寄住滑州。忽晝寢。俄見二皂衣立階下。盧問為誰。荅曰。里正奉帖追請。盧甚愴惶。間已見備馬於階下。遂不得已上馬而行。回顧

見其屍卧牀上。方驚已死。悔恨不得與母親屬相別。行至數里。觀一門牆甚高峻。問此何地。吏云乃御史大夫院也。問御史何人。云大夫姓李名某。盧驚喜曰。即吾表兄也。因入見之。問云。君壽已盡。未審平日有何善功。答曰。在生常誦玉皇經。李云。此經乃聖教之骨髓。其功德莫可稱量。盧顧見院左右網中。皆衣冠之士數十輩。忽有頂禮哀告者。盧問此悉何人。云。乃陽間衣冠之士。不顧罪福。恣作種種不善之業。以致罪根深重。故陷經中。無由解脫。盧甚嘆憫。李云。聞君經功甚重。故命至。可為罪囚持誦真經。令脫苦處。亦君之福利矣。遂設金牀。命盧陞座。盧至心默誦玉皇經。至神呪品。已見網中罪囚半有出頭者。經終俱出地上。或衣大袖者。或冠帶常服者。或馭車乘騎。或徒步遲回。須臾悉皆隱去。盧亦復得還生。再延福壽。故知玉皇經拔地獄者。誠不誣矣。

宋端平丙申冬。金兵犯蜀。有眉州丹稜縣東館鎮士人劉天澤。持誦玉皇經。終始不渝。是日其家已先遁。劉適在後。背負是經。方出門。乃與金兵遇。自謂必死。拜以求免。且默誦寶誥。金人連發數矢。如有障隔。射皆不中。亟

下馬殺之。未及追劉而馬逸。金人乃奔馬。劉遂解脫。

昔衡山縣武陽鄉同烏墟有程萬里者。持誦玉皇經。精勤備至。嘗為商往來蜀中。一日附舟出夔門。適江漲湍急。觸碎是舟。皆焚魚腹。獨萬里附一板。須臾達岸。所誦之經。隨身而至。視之全不濡濕。萬里乃發心創庵於所居之側。所食惟淡飯而已。自是終日持經不輟。

唐元和五年。李元一。任饒州司馬。有女居別院中。忽有鬼神驚悸而卒。顏色不變。其夫嚴訥。自秦州來蒼梧。見其妻恍惚行水上而至。訥驚問。妻泣曰。我已死矣。今鬼也。訥駭。妻語之曰。此近北鴈浦村。有嚴夫子教衆學。彼有奇術。公往告請哀救。妾庶得更生矣。訥往。果有嚴夫子。拜詣哭訴。盡啓元因。嚴初怒是狂來見侮。又拜泣淚交下。嚴久方謂曰。殺夫人者王將軍也。葬在堂西北柱下。為設醮。轉玉皇經于其柱下。則小娘子必當再生。訥因問求經。嚴云。觀中有也。訥乃拜謝。疾往郡城。明旦到。具其事。白外父元一。取經設醮。經纔一部半。女乃開目。尚不能言。及醮散。便言云。承君功德。何敢忘之。然此堂中柱下有王將軍枯骨一具。抱一短劍。君為改葬。劍請

便留以酬公惠。發之果驗。遂厚葬之。留其劍。元一遂寫經百部而施。

唐張政。豫州新恩縣人。開成三年七月十五日暴亡。初見四人來捉。行半日至一大江。面甚闊。度深三尺許。張政細看。盡是膿血。政即密念玉皇經。使者請止。及入城。見在世。日勸令持經。道士從署中出。然結束奇異。急迎拜。道士乃罵鬼使。如何不依帖。妄追平人。鬼使惶恐驚拜。及見王。王降階迎接。道士上殿對坐。道士曰。張政是吾弟子。被妄領來。可速送還。王曰。畧俟勘對此人壽筭及祿簿。道士神色似怒。王見急索帖。上判放去字。道士乃拂袖起。王即持道士手。喚使者四人近前叱之。皆著大枷。綑列廊下。道士同政出。乃私謂政曰。自此宜戒酒持經。乃引政看地獄。初入一處。見大鑊行列。其下燃火。鑊中煮人。痛苦莫不慘惻。更有鐵牀。其上燒炭炙人。皆焦黑。形容不辨。西頭有三人枯黑。頗似婦人。佇立廊下。向政叩頭云。不得食不知幾歲。政云。我亦自無。何得與你。遂發願斷酒。乃引政回。遂前渡水。道士曰。合眼。以杖一擊。乃活。

唐龔勉者。雲中人也。年少有勇氣。善騎射。能以力格猛獸。不用兵仗。北都

守健其勇。署為牙將。以兵士千人軍于飛狐城。時薊門帥驕悍。棄天子法。文宗時。詔北都守攻其南。詔未至。而薊門兵夜伐飛狐城。鉦鼓震地。飛狐人悽然不自安。謂勉曰。薊兵勢不可敵。今且至。其勢甚急。願空邑以走。不然。旦夕拔吾城。吾不忍父母妻子盡血賊刃之下。雖天子神武。安能雪吾冤乎。勉自度兵少。不能折薊師之衆。欲從邑人語。恐得罪於天子。欲堅壁。恐一邑之民盡屠于賊。憂既甚。而計未決。忽有探者報云。賊且潰矣。有粟并甲在城下。願取之。勉奔垣望。時星月明朗。見賊兵潰走。顛踣者不可勝數。若有大兵擊其後。勉大喜。開門縱兵逐之。生擒得賊兵數十千。得遺甲甚多。先是勉篤信大道。常誦玉皇本行集經。既敗薊師。多得其士卒。勉召訊問之。曰。向者望見城上。有巨人數十。身長數丈。雄俊可懼。怒目呿吻。掛金甲。手執劍戟。因見之。盡驚駭汗流。即馳走遠避。安有闔心乎。勉始悟巨人。乃飛天神王也。益自竒之。勉累官至御史中丞。後為清塞副使。得非經之力乎。

唐開化中。有王少府者。專心持誦玉皇經萬遍。忽於一夕夢見仙人謂曰。

予之念誦殊為精誠。所惜本誤而功薄也。王少府稽首告請真文。仙人乃授之以廣文句。一一傳授訖。送仙人出門。光景如晝。忽然而覺。視室中僕吏猶睡。乃呼而責之。已明矣。左右遽報曰。今方夜半。須臾漸漸光滅。及旦。王少府自異所見。閉目誦之。歷歷清暢。轉益精誠。自是每日肅心莊誦。儼如對越。未嘗少間。或時夜誦之際。彷彿如見神人。左右侍衛。一時好道之士。聞其靈異。並加敬信。天寶初。一日無病而卒。忽見二鬼使來追。遂隨行十數里。至一大樹下。二使同坐憇。忽思憶玉皇經。遂閉目誦之。纔一部。回顧二鬼使。已不知所之。須臾四人至。跪告少府曰。仁者修行。有此利益。向來追君二使。已生天矣。不知仁者崇奉何等功德。如是甚大。王少府曰。吾但誦玉皇本行集經爾。四人叩頭曰。唯此功德之故也。請為弟子誦之。救拔苦難。王少府誦之部半。開目又不見四人。須臾空中聞曳甲之聲。有一神人。紫服披甲。儀衛侍從甚雄。前跪而言曰。吾是五道冥司。任頗重且貴。然終未離鬼道。願求生天。彼六人者。以公法力之故。各得生天。今請同步至弟子所居誦之。冀福蔭之餘也。乃相隨至一陂澤。方圓近十畝。皆是罪

人枷杻囚縛。決罰訊問。拷掠之所也。神乃壘石為座。神與諸部從長跪座下。合掌聽之。王少府閉目誦之三部。舉目四顧。一人不見。惟有斷枷破杻。繫鎖而已。王少府驚悚。罔知所適。忽然有童子四人來云。王請公速回。亂我曹局文簿。破我冥司枷杻數童子前導。王少府入一空谷中。遂生實王皇本行集經不可思議之力也。于是太清宮王師及法師張承光聞王少府說。三復敬嘆神奇之事。深加敬異。既皆同業。各持本校勘。文句多少並同。如一本焉。彼此相慶賀。王師云。吾此本受之於太清宮聖公。王少府曰。吾本因夢遇仙得之。張承光曰。吾本受之於西王母。寶篆尚存。三人咸歡共觀其本。經旨字數如一。王少府遂捨家從隱逸。三人乃同入王屋山修道。

漢李氏顯慶中。太平州人孫壽獵于海濱。遇野火延燎。草木蕩盡。惟有一叢草甚茂。獨不燒。壽疑草中有伏獸。遂燭之。竟不燃。壽深恠訝。乃即入窺視。見有一塋塚。蓋經天雨傾陷。殿缺中有棺。乃石焉。傍記銘云。大漢建平二年。念王皇經李氏女墓。火之不及。蓋由此也。因念棺槨中必以經附葬。

馬乃命翮頭棄鷹鳥在地。開函看之。其人身之上衣。飄飄然隨風而化。然其
人綠毛蔽體。莫類人身。其髮堆蟠。露其面。手足爪甲。屈曲拳拳。各長尺餘。
其體溫若新死。壽始見之大恐悚。因出至于外。觀其顏色不變於壁間。有
匣開之。隨手粉壞。果有經在內。其經匝幅已皆糜爛。獨其經如故。壽見其
神驗。因歸為造衣衾重葬之。自此壽更不復獵。遂捨家出求解脫道。

昔朱仙見夢昌州何應龍曰。汝文章行業雖達天庭。緣宿業未除。御筆批
遲一紀。惟誦玉皇本行集經。可以消免。何公如戒誦持。辛酉赴舉。大魁川
省。又見夢簡州李鳴鳳曰。吾親書玉帝聖號。若誦持供養。當令榮顯高科。
子孫書種不斷。李公誠敬誦念。甲子過省。名冠四川。

宋周乾字亨嗣。其先淶江昭靈人也。咸淳初。教學於湘之攝江。後遂家焉。
乾恪奉道法。崇脩齋會。敬慕玉皇本行集經。居常持誦。乙亥兵火。民居煨
燼。家室淪散。妻為亂兵虜去。不知所之。至元中。歸附於元。乾思慕無已。迺
夜焚香。仰天虔禱。誓誦玉皇經萬部。為祝曰。妻存則復。翼完聚。亡則以經
力薦之。誓畢。遂虔心持齋誦經三年。晝夜不輟。至元戊寅冬。誦畢萬遍。是

夕命道酬懺。中夜遽感異夢。至翌旦有北軍一人。自嶺南征歸。乘舟下流。竟造其家。送其妻還乾而去。攝江之人至今稱之。後乾夫婦居安數年。偕老而亡。

宋譚應乾。世嚴儒業。時鄉貢不舉。以宗壻游仕嶺南。年踰耳順。遂居攝江。歛學杜門。退處。常以平時叅受道法。普施符藥。濟人利物。嘗受持玉皇經。宗盟道會。乙亥兵革剽蕩之餘。父子解散。時翁年七十有五矣。避地於博濟壇。壇之左右前後。罹兵刃者。橫屍滿地。乃翁執經。常讀誦於雷閣下。終日不輟。凡北軍往來。日以百數。見者驚嘆。皆曰。此老異人。戒勿恐動。或棄錢米等物。予之而去。是歲冬。歿于道士王希微之寢室。留頌於壁。其畧曰。今朝脫蛻。博濟魔王保舉相迎。至元丙子。歸附於元。壇之道衆。稍覺旋集。啓戶視之。身體面目衣服。寢處如故。畧無毫髮之損。

元譚周者。應乾之子也。敬慕道法。常誦玉皇本行集經。至元丙子。歸元。後年已五十。艱險備嘗。性理頗悟。受持尤謹。每有叩禱。立獲感應。至元甲午秋。携小价之醴泉訪親。假道諸市。抵暮未至。止于渡北十五里石子塘。時

諸店行旅盈集。前見獨有一舍。父子偶處。往就宿焉。比寢方寤間。忽聞肆中擊搏。門戶開闔。震響殊甚。若寇入室。其家父子俱各寂然。小价亦默。周歌枕靜聽良久。忽夢處一室。焚香誦王帝功德大之頌。厲聲琅然。未幾有人馳報。一官人在門求見。及誦畢。忽一人欄幙端簡趨進。拱立于前。竊視之。乃舊友也。周顧謂之曰。吾閒寂誦經于此。爾冒領鄉薦。何至以官宦給我對越耶。語畢驚悟。時夜將半。室中頃洞之聲俱恬然矣。達旦欲詢店主。不果而行。中塗价者以告曰。疇昔假館之榻。乃彼店婦縊死之處。以故無人托宿。吾二人者。終夕賴無恐焉。方知所夢官人者。蓋此境里社神也。

元南雲黃德父。習諳吏道。敬奉道法。常夜伺家人寢後。於中宵人靜時。明燭焚香。持誦玉皇本行集經。祈禱多獲感應。至大德年間。捐財命匠于家刊本印施玉皇經千部。一夕於夜半後。聞處中庭燃燈炳燭。對天焚香。誦經至下卷未竟。忽烈風迅作。經筵燈燭俱滅。俄一人自空而下。竦立于傍。長可丈餘。衣襪戴帽。秉巨筆。毫芒光燦。口眼火焰燦人。莫能仰視。竊窺乃雷霆辛都督也。德父惶懼。俯伏謝罪。稽首至百餘拜。忽厲聲曰。汝若印經

成就。不可妄施與人。須令當面誦過一遍。字句若無差誤。方可授受。切勿輕易。敬之慎之。言訖不見。時家人已寢。聞磬音久寂。亟命婢秉燭出視。猶聞滿室皆硫黃氣未絕。德父危立庭中。汗流浹背。燭視大門數重。皆洞然豁開。由是去矣。自是德父不敢輕施。凡有請者。直令誦過方與。越數年後。德父即世。厥嗣繼志。所施經本亦令誦過方授。以是知經中所謂非人勿施者。其斯之謂歟。

元吉。安路廬陵縣儒行鄉仙桂里吳宗珍。大德壬寅上元。為男日榮。初因患疹。後變風癩。手足拘攣。語言瘖嘿。諸藥罔功。宗珍發心許施玉皇本行集經一千部。施經之日。其子之疾立愈。皆謂神靈之應。

唐丞相張鑑。父齊丘。崇敬道法。常清晨更新衣于三清殿前。誦玉皇經一部。已積數年。略無懈心。時永泰初。為朔方節度使。一日。衙內有一將兵謀叛。恐事露未決。亟扇動心腹者數百人。就衙欲謀齊丘。齊丘衙退。閑行於小廳前。忽見有甲士三四人。持刀奔入廳之左右。僕吏亦驚走。齊丘縱步過小廳回顧。絕無人跡。疑是鬼恠。及入宅。其眷屬亦驚呼。云有甲士數十

人走入廳上。齊立忙惶。忽聞人叫云。衙將謀叛亂直入。恐傷至帥。齊立聞之。錯愕無所措。良久十餘兵。屹然面偏于庭。舉頭張口。投刃于地。衆遂擒縛。瘖不能言。餘者俱首云。適因衙將叛。某等謀欲上廳殺主帥。忽見廳左右有甲士四人。各長丈餘。挺刃瞋目呵叱。電光燦人。初如中惡。皆不可近。於是齊立聞之。駭甚。遂將叛兵根問。依法施行。齊立自後懇切虔恭。禁戒葷酒。終日持誦是經。回謝神人擁護得解叛賊之恩。此經所謂所在有飛天神王擁護之驗也。

宋慶元間梓州寶珠會。凡遇誦經有跛者王明。策杖常至聽經。一日至十方無量度人處。似有壯力人拽其脚。視之不見。遂棄杖而歸。人問其故。明曰。予二十年聽經。方知說經四遍。跛病積逮。皆能起行之驗。

宋江州德化縣李信一。開雜貨鋪。每旦於鋪床上誦度人經一過。寶祐年間。其下偶頓二雞母。抱二十四鴨卵。兩月不生。一夕夢一羣人羅拜其前。曰。我輩今脫禽類。得為人身。皆拜超度之賜。李寤而恠之。旦視雞抱之卵。皆空殼矣。

漢崔晝者。汝陽侯仲牟之後。嘗謁白雲先生。學脩身之術。先生曰。汝富貴之子。何思淡泊。崔子避席而對曰。以財賤人。財有數而人無厭矣。以爵賞人。爵既崇而人或驕矣。何如示我以道。將以普濟生靈。先生曰。吾道之內。有度人經在。汝可誦之。崔晝乃作禮承受。至誠誦之。厥後有使者馳一緘遺崔公曰。子之先君。令吾將此謝汝。言訖。使者忽然不見。於是啓緘熟眎之。果認得先君親札。云。感汝念誦度人經功德之力。累世之祖盡生天矣。自後崔晝之家。念誦不絕。

唐崔玄亮常持黃庭度人道德諸經。未嘗曠廢。其後以感通之至。彌加篤勵。去世之時。入靜室諷黃庭。無疾而化。將葬。棺輕若空衣焉。人謂之尸解云。

唐姚生者。華原人也。幼而好道。持黃庭經。光啓中。僖宗再幸陳倉。遠近驚擾。姚生為賊所迫。夜走墮枯井中。傷足。求出未得。乃傍有窰窟。穴匿於其中。晝夜念經。因不飢渴。足疾亦愈。時襄王既平。大駕歸闕。鄉里人戶稍復有。遊軍夜宿井側。見井中有光。掘而出之。具述經靈驗。遂為道士居華原。

西界觀

唐汾州刺史崔恭。小女崔少玄。初生時異香襲人。端麗殊絕。右手有文曰。盧自列妻。後十八年歸于盧陳。陳小字白列。歲餘陳從事閩中。過建溪。遙望武夷東峯中。有神人乘雲而來。告陳曰。王華君來乎。陳問曰。誰為王華君。曰。君妻即王華君也。陳因告之。少玄曰。扶桑夫人紫霄元君果來迎我耶。遂整衣出見神人。對語久之。既退。陳問之。荅曰。少玄昔居無欲天。為玉皇左侍書。賜名之曰王華君。主下界三十六洞學道之人。每至秋分日。即持簿來訪志道之士。覈功過之實。因為與同宮四人。退居靜室。恍惚如有慾想。太上責之。謫居人世。為君之妻。忽已二十三年。自今不復近附於君矣。少玄自是獨居靜室。往往有女真。或二。或四。來詣其室。升堂連榻笑語通夕。恭既解印。與陳俱家于洛陽。一日少玄詣其父曰。大人之命。將極於四月十七日。少玄受劬勞之恩。敢不救護。遂發絳箱。取扶桑大帝金書。黃庭內景之書。致於其父曰。若非此書。不可救免。今將授父。可讀萬遍。以延一紀。乃令恭沐浴。少玄授以功章。寫於青紙。封以素函。奏之上帝。須臾有

三朱衣自空而來。手持功章而去。恭大異之。經月餘。必玄語陳曰。王清真侶。將復召予為玉皇左侍書。將欲返神。還于無形。余留詩一首以遺子。子當記之。其詩曰。得一之元。匪受自天。太老之真。無上之仙。含影藏形。出於自然。真安匪求。神之久留。淑義則真。體性剛柔。丹霄碧虛。上聖之儔。百歲之後。空餘墳丘。後恭以誦黃庭內景之功。果獲延壽。

晉李昌遐者。後漢兗州刺史之後也。生而奉道。常誦太上靈寶昇玄消災護命經。而稟性柔弱。每為衆流之所侵虐。忽因晝寢。夢坐烟霞之境。四顧而望。熊羆虎豹。圍繞周帀。莫知所措。于時空中有一道士。呼其名而語之曰。吾即救苦真人也。汝勿驚駭。吾奉太上符命。與諸神將。密衛於汝。昌遐既覺。豁然大悟。因知自前圍繞我者。非禍患殃咎。蓋經中所謂金精猛獸侍衛是經也。

唐尹言者。與明道大師尹嗣玄為宗姓之弟。常潔身持戒。崇道慕善。孜孜不倦。因詣嗣玄。受陰符經。至誠諷念。為其常少記性。頗得心神聰爽。受之數年。念逾萬遍。稍覺心力開悟。因本命日。齋潔焚香。念三十遍。忽了憶前

生之事。姓張名慶厚。在延壽坊居。家有巨業。兒女皆存。記其小字年幾。一明了。與其家說之。乃往尋訪。述張生死年月。形色情性。無所差異。張之兒女聞之。嗚咽感動。言其今之狀貌。與昔不殊。但性較舒緩耳。自是兩家契為骨肉。黃寇犯闕之前。其二家皆在。

宋台州仙居縣城西王竺。有次男王淨。年四歲。嘉定乙亥六月十二日午時生。因戊寅年二月二十三日。竺帶出閑嬉。被邪祟侵害。回家不能語言。至二十六日戌時身死。竺情切發心。命工刊太上感應篇印施。欲求亡男王淨魂魄。再投母胎。復為兒子。果蒙感應。妻黃四九娘已卯春有姙。至于三月二十八日夜。夢到黃岩縣定光觀黃籙普度大會。附薦所。同亡男王淨共轎歸家。夢覺胎姙微動。至十月十八日申時生一男子。捨在東嶽行宮。取名師回。至乙酉年妻復有孕。得病甚篤。四月二十八日。命工刊感應篇板。病則繼痊。

宋張道人。不記其名。天彭人也。家以酒業破蕩。遂慕道流。落於嘉眉黎雅間。口傳太上感應篇緣化以充旦暮。慶元元年夏六月。雲遊至雅安。有一

茶肆日供齋饌。令道人念誦此經。雖為至誠轉誦。然止能誦其半而未究全篇。每以為愧。數日前以疾卧於此。其月十二日早。忽然困絕。初死之時。見一鬼吏呼之前行。至一官府。恍若嘉州憲司。方入門。見飢餓者無數。又過一門。有一大庭。見庭下旗幟羅列。劍戟滿前。有一人坐於廳上。遂引至前。問曰。你在生之日。誦太上感應篇。何故止誦其半。道人竟不敢答。又曰。汝雖有過而亦有功。令還人間。更受辛苦百日。吏遂引出。謂曰。汝以誦經不及全篇。所以至此。今既生還。若到人間。可究全篇。及化世人誦念此經。即可免汝之罪。言訖而覺。時學諭宋子止見之。道人具言其事。復泣而告曰。貧道所見如此。乞為作一方便。以太上感應篇普勸念誦。一以願奉道之人消災集福。一以少贖貧道不誦全篇之罪。乃知太上感應篇其為冥司取重如此。

宋蘭州進士王巽。於開禧丁卯之冬。染病困篤。為陰府所攝。比至一山。樓宇壯麗。金釘朱門。金字大書曰東嶽府。內則廊廡清肅。階陛峻嚴。有青衣道士數輩。如以職役於下。仰視殿左一碑。高可丈餘。乃金書太上感應篇。

誦讀敬禮而出。復經從一所在。宛如官府榜曰。速報司。方竦然而身已至於庑矣。人亦衆聚。有繫縛者。有從容者。半可面識。各以善惡照對。所拘不相存問。俄聞呼異姓名曰。太上聖訓。汝既面覩。切宜遵奉。從此當持法戒。聞之釋然。其疾頓愈。遂終身崇奉不怠。

宋黃巖縣進士楊琛。覩刊感應篇。遂占助一板。甲子春。夢神人告曰。已排君在第二甲第十七名。意謂應在科舉。次日刊局發板樣。請金乃刊琛名。在第二卷第十七板。丁酉春。板將成就。刊局欲再作小卷。刊施本文。使人便於持誦。庶幾由誦而覺。由覺而行。進士沈球。因內子項氏有娠多病。發心刊施。至三月庚申日刊成。刊者捧板至門。項氏即產。不移時刻。母子俱慶。且無少艱。

宋祈門汪氏子。自番陽如池州。欲宿建德縣。未至。一舍間遇親故。居留與飲。行李已先發。飲罷。獨乘馬行。遂迷失道。與從者不復相值。深入支徑。榛莽中。日且曠黑。數人突出執之。行十里許。至深山古廟中。反縛于柱。數人皆焚香酌酒。拜神像前。有自得之色。禱曰。請大王自取。乃扃廟門而去。汪

始知其殺人祭鬼。悲懼不自勝。平時習大悲咒。至是但默誦乞靈而已。中夜大風雨。林木震動。聲如雷吼。門軋然豁開。有物從外入。目光如炬。照映廊廡。視之大蟒也。奮迅張口。欲起就汪。汪戰栗。誦咒愈苦。蛇相去丈餘。若有礙其前。退而復進者三。頸首徑出。天欲曉。外人鼓譟而來。欲飲神胙。見汪依然。大駭問故。具以事語之。相顧曰。此官人有福。我輩不當得獻也。解縛謝之。送出官道。

昔有開食肆者。死為陰府追去。冥官殿下。猪羊鵝鴨。取命者無限。又有數大鑊。臭穢羹汁。獄卒逼令食之。其人驚怖。即念玉皇寶誥。王即下拜。諸畜盡皆退去。鑊中羹汁已竭。王曰。汝有此善心。非惟能免自罪。抑且冤債俱獲超度矣。更延半紀。可還人間。勸人持誦功德。不可思議。今世之人。如能信心。異日為護身符也。

宋樂平畱田院僧仲脩。姓李氏。持戒頗謹。最善談誦孔雀經。僧輩罕能之。以故邀請相繼。院近大溪。有寒橋。既峻且險。往來之人。常罹墜溺之厄。近住富者。視如他境。莫肯脩治。仲脩每過時。諷大悲咒一遍。及稱當界土地。

生歡喜。七聲而去。一夕獨歸。聞有人相語。李太師來。已是十分醉了。如何過得此橋。有荅曰。吾曹謝他回向多。合為致力。於是或扶其前。或策其後。暨到彼岸。仲脩因禮謝之。見累累然皆跳入水中。方悟為鬼物。謝其經卷之賜云。

宋鄱陽大塘湖洪媪。為其子納一幼婦。年十四歲。俗稱為童養者也。媪每夕挾之同寢。嘗以五更自起。開房後小門登廁。至曉不還。媪尋叫不已。仍邀集鄰伍。徧處搜討。更不可得。遂往和眾坊。從黃見鬼山人占課影。黃書兩鬼執一人云。此女只在住屋後。須急去尋。若過酉時。便落空亡矣。於是奔而歸。又不見。鄰叟汪公著。素誦消災咒。行坐弗舍。正把刀斫竹篠。作捕鰕簣。而吟誦喃謨三滿多。毋陀喃。忽聞篠內有人聲。就視之。乃覩女蹲坐其下。口鼻眼耳皆為黃泥塞汙。即報近眾救挈與歸。問所遇。曰。纔欲上廁。被兩箇婦人捉捺在篠叢裏。我望見。遂與隣舍往來相覓。欲應荅之間。兩婦人揜我口。做聲不出。未久。兩婦自相覷言。多有兵甲人馬來。放手走脫。今知是汪公神呪之力。若遲一時辰。定壞性命。思之甚可怕也。

唐王乙者。自少恒持如意輪呪。開元初。徒侶三人。將適河北。有船夫求載乙等。不甚論錢直。云正爾自行。故不計價。乙初不欲去。謂其徒曰。彼賤其價。是誘我也。得非包藏禍心乎。船人云。所得資者。只以供酒肉之費。但因長者得不滯行李。爾其徒信之。乃渡。仍市酒供飲。頻舉酒屬乙。乙屢問空中言。勿飲。心愈驚駭。因是有所疑。酒雖入口者。亦潛吐出。由是獨得不醉。泊夜秉燭。其徒悉已大鼻。音汗。息也。乙慮有非。為默坐念呪。忽見船人持一大斧刃。可長六七寸。從水倉中入。斷二奴頭。又斬二伴。次當至乙。乙伏地受死。其燭忽爾自滅。乙被斫三斧。背後有門。久已釘塞。忽有二人從門扶乙投水。岸下水深。又投於岸。血雖被體。而不甚痛。行十餘里。至一草舍。揚聲云。被賊刦。舍中人收乙入房。以為拒閉。及明報縣。吏人引乙至刦所。見岸高數十丈。方知神呪之力。後五六日。汴州獲賊。問所以。云爾夕忽暗。便失王乙。不知所之。乙瘡雖破而不損骨。未幾平愈如故。此持如意輪呪之功也。

陳時川蜀中有一士登科者。因赴調投宿失道。至暮不遇店。一僕一馬。懷

惶窘怯。忽見一野次。燈燭甚盛。羅列几案。五六客據坐。酒肉盈前。士就揖之。皆相顧有喜色。曰。我曹相聚。正恨冷落。得官人肯臨。可謂大幸。遂邀駐同飲。仍請居東向。士辭不敢。往復良久。竟處主席。且使着公服拜神。酌數盃後。一髯者起。白曰。敢問吾官所能。士曰。本書生。竊科第。只解作詩賦。他無所長。固問之。曰。實然。與諸君昧平生。遽蒙延接。苟有薄技。尚何隱之有。髯怒發語抵突。意若不善。士佯起如廁。跨馬疾馳。彼亦不追逐。行三四十里。且五更。得孤寺。扣門。僧出問故。即推之出。曰。切勿相累。事既至此。已無可奈何。士垂淚乞救。僧云。君於道釋二典中有所習否。曰。粗記白傘蓋真言。僧曰。足矣。但堅坐金剛背後。僕馬莫相遠。若見異境。但誦此文。士如其戒。俄頃。刀劍鏗然。飛集無數。士閉目默誦真言。又聞兵器戛擊。甲騎縱橫。而俱不能相向。迨天明愈劇。逼暮方止。士飢渴憂危。始見僧來。招入寺。謂曰。此輩皆習南法。害人極多。每一歲必擇日具禮祭神而餒其胙。然後較藝。或新得一法。彼此傳授。渠見君至。以為同業。故相待如此。既不如所欲。致謀加禍。昨日吾所不敢納君者。畏其遷怒也。今不得有所施。彼諸人行

且自促豐答。他日當知之。留至明日登途。沿路戈甲斧劒以千萬計。悉剪紙所為者。白傘蓋者。三十一百三十字。在諸呪中最為難讀。頗與孔雀明王經相似。僧徒亦罕有能誦習者。故妖魔外道敬畏之云。

唐長沙人姓吳。征蠻卒夫也。平生以捕獵漁釣為業。嘗得白龜炙而食之。乃遍身患瘡。悉皆潰爛。痛苦號叫。斯須不可忍。眉鬚手足指皆墮落。未即死。遂乞於安南市中。有僧見而哀之。謂曰。汝可回心念大悲真言。吾當口授。若能精進。必獲善報。卒依其言受之。一心念誦。爾後瘡痍漸復。手足指皆生。以至平愈。遂削髮為僧。號智益。於伏波將軍舊宅建立精舍住持。

南齊瑞安士人曹穀。字覺老。少出家為行者。其家累世病傳尸。住門戶者。一旦盡死。無人以奉祭祀。穀乃還儒冠。後數年。亦病作。念無以為計。但晝夜持誦消災呪。一日誦最多。至萬遍。覺三蟲自身出。二在項背。一在腹上。周匝急行。如走避之狀。穀恐畏不敢視。但益誦呪。忽頂上光如電。蟲失所之。疾遂愈。

宋袁可以。嘗教其弟昶以寶樓閣呪。昶不甚深信。然旦起必誦三五十遍。

初未知其功效也。紹興三年夏肄業府學。方大軍之後。城邑荒殘。直齋卒汪成。每番宿室中。必夢魘。達旦方已。無一夕安寢。成殊以為苦。或詢之。荅曰。被人捽髮。欲加箠。故呼呌拒之。和令徙於已房。猶不止。同舍生惡其妨睡。共議遣逐。和試書呪語貼於柱。此夜晏然。由是一齊妖祟絕跡。其呪語即所謂唵摩呢達哩吽撥吒八字。但世俗所傳訛謬。寫皆從口。而亦不得其音。要當取大藏中善本。元初譯師言為證。自有大功。和因悔昔慢始薦奉之。秘其事。

宋晉江主簿陳舜民。被檄詣福州。未至三驛。已就館。從者皆出外。獨坐于堂。有婦人從東偏房出。著淡黃衫。靚裝甚濟。徘徊堂上。歌新水詞。兩闋。舜民知其鬼物。惟端坐持呪。殊不之顧。婦緩步低唱。其容如初。舜民益疾誦呪聲。漸厲。婦人乃默然。歛容趨去。遂不見。

宋全州朱推官。母王氏。朱道誠之妻也。日誦十句觀音心呪。時年四十九。病篤。家人方治後事。王氏恍然見青衣人曰。爾平生持觀世音心呪。但復少十九字。增之當益壽。王曰。我不識字。奈何。青衣曰。隨聲誦記之。乃曰。天

羅神。地羅神。人離難難離身。一切灾殃化為塵。久之而醒。疾亦尋愈。後至七十九。

宋天竺悟法師。錢塘人。每誦呪時。身出舍利。所供像亦如之。天聖三年。慈雲欲以智者教觀求入大藏。文穆王公擬達天聰。悟曰。此非常之事。小子將助之。乃繪千手像。誦大悲密語。誓曰。事果遂。當焚此軀。未幾。公薨。悟益加精勵。晝夜不廢。越歲。乃克如志。悟遂吞前誓。新盡尸在。袈裟覆體。儼然如生。衆咸異之。慈雲再積香木。焚乃方壞。舍利無數。

昔僧寶通。梵行精修。長誦法華經。陀羅尼品。稍有靈異。時楊橋村有趙氏家。妻為神所魅。請通持呪。通既至。神即現形。通告曰。神在村中。合當興福。如何反魅於人。神曰。非弟子事。此乃部下小鬼耳。遂呼小鬼至前。責罰趙妻。因此得差。續後趙妻之病仍發。歌吟竟夕。又告通。通又去。見所責鬼在病牀前。通曰。前曾誡治。那得再來。汝若不去。吾當誦呪。令汝頭作七分。如阿梨樹枝也。鬼叩頭求哀云。不煩呪也。從此病差。鬼不復至矣。

宋廬山李商老。因修造犯土。舉家病腫。求醫不效。乃淨掃室宇。骨肉各令

齋心焚香。持誦消災呪。以禳所忤。未滿七日。夜夢白衣老人騎牛在其家。忽地陷旋旋沒去。翌日大小皆無恙。志誠所感。速如影響。非佛力能如是乎。

唐賢首國師謂塵律師云。賢安坊中郭神亮。暴亡七日方蘇。當時被使者追至平等王處問罪。訖引至地獄中。見一僧教誦一偈云。若人欲了知三世一切佛。應觀法界性。一切惟心造。亮連誦數遍。同受罪者數萬人。皆脫地獄。國師云。此華嚴第四會中偈也。塵遂取經檢之。果見十行偈中。最後偈也。

唐歐陽璨住徐州南五十里。居家常誦大悲神呪。一日到城。薄晚方回。不
一二里已昏暝矣。是夕陰晦。約行三十里。則夏雨大澍。雷電震發。路之半。有山林夾道。密林邃谷。而多驚獸。璨怖懼不已。既達山路。雨勢彌盛。俄見巨物出於面前。纔十餘步。長丈餘。色正白。亦不辨手足之狀。但導前而行。璨恐悸尤極。舊嘗諷大悲神呪。欲朗誦之。口已噤矣。遂心存念之三遍。則能言矣。誦之不輟。俄失其妖。去家漸近。雨亦稍止。

宋福州永福縣能仁寺護山林神。乃生縛獼猴以泥裹塑。謂之猴王。歲月滋久。遂為居民妖祟。寺當福泉南。劍興化四郡界。村俗怖聞其名。遭之者初作大寒熱。漸病狂不食。緣籬升木。自投於地。往往致死。小兒被害尤甚。於是祠者益衆。祭血未嘗一日乾也。祭之不瘥。則召巫覡乘夜至寺前。鳴鑼吹角。目曰取攝。寺衆聞之。亦撞鍾擊鼓。與相應。言助神戰邪。習日甚。莫之或改。長老宗演聞而嘆曰。汝可謂至苦。其殺汝者既受報。而汝淫及平人。積業轉深。何時可脫。為誦梵語大悲呪。資度之。是夜獨坐。見婦人。人身猴足。血污左腋下。旁一小猴。腰間鐵索。繫兩手。抱穉女。再拜于前曰。弟子猴王也。久抱沉寃之痛。今賴法力得解脫。生天故來致謝。復乞解小猴索。演從之。且說偈曰。猴王久受幽沉苦。法力冥資得上天。須信自心元是佛。靈光洞曜沒中邊。聽偈已。再拜而去。明日啓其堂。施鎖三重。蓋頃年曾為巫者射中左腋。以是常深閉。猴負小女如所覩。乃碎之。并部從三十餘軀。亦皆鳥鳶梟鵩之類。所為也。投之溪流。其恠遂絕。

唐彭城劉載之。儒家子。脩辭學外。常事北極香火不懈。多寓京師。少而神

氣怯懦。每驚魘。往往不悟。嘗遇蘇門道士劉大觀。授以天蓬神呪。令持誦千遍。載之勤而行焉。絕葷腥。專香火。逆旅之中。亦拳拳脩尚。自是無復魘悸矣。寇陷長安。在宣揚里。為寇所虜。力役勞苦之事。素非其所能。稍或遲舒。必承之以劒。性命憂迫。在乎頃刻。而密誦神呪。以求其祐。是夕有一人如軍士之飾。謂之曰。勞役之事。吾為子免之。此有徑路。可以脫禍。可相隨而行也。載之疑為寇所試。辭焉。此人引其手。若騰躍於空中。良久。履地。是夕月光如晝。但見山川參差。泉聲流激。已在巨石之上。驚異之際。有村童前引入洞府中。宮闕深嚴。層城煥麗。金樓玉堂。奇禽珍木。周環數十里。有謁者平冠褒袖。云大帝君令於賓宇。憇息。俄賜酒饌仙果。二仙官與之宴飲。載之問大帝君所主何國。某未曾朝拜。忽奉恩勅。深所憂懼。仙官曰。大帝是北斗之中。紫微上宮玄卿大帝君也。上理北極。下統鄠都。陰境帝君。乃大帝之所部。天蓬上將。即大帝之元帥也。吾子冥心北元尊神呪。而值此危難。將陷鋒鏑。大帝閱籍。當在驅除之伍。仰軫聖慮。已奏章太上。述勤瘁之心。延壽三紀。使還於故里爾。頃之得朝謁大帝。叩顙謝恩於闕下。命

二童送之。食頃已達泗州。其友人謝良奏事行朝。具話其事。是則大帝之昭鑒。天蓬之威神。不遺毫分之善也。

唐主道珂。成都雙流縣南筓居住。當僖宗幸蜀之時。常以卜筮符術為業。行坐常誦天蓬咒。每入雙流市貨符卜。得錢須沽酒。至醉方歸。其郭門外有白馬將軍廟。曉夕有人祈賽。長垂簾。簾內往往有光。及聞吹口之聲。以此妖異人皆競信。所下酒食。忽忽不見。愚民畏懼。無敢正視者。道珂因飲酒回歸。入廟朗誦神咒。則廟堂之上悄悄然。傍人眎之。無不驚駭。道珂異日晨雞初叫。忽隨村人檐筓赴市。夜行至廟門。忽然倒地。倉惶之間。見野狐數頭。眼如火炬。銜拽入廟堂堦之下。聞堂上有呵責曰。你何得恃酒入我廟內。念咒驚動我眷屬。道珂心中默持天蓬神咒。逡巡却蘇。蓋緣其時與擎蒜同行。神兵遠其臭穢而不衛其身。遂被妖狐擒伏。洎擎蒜人拋去。道珂心中想念神咒。即妖狐便致害不得。既蘇息之後。遂歸家沐浴清潔。却來廟內大詬而責曰。我是太上弟子。常誦道經。經云。天得一以清。地得一以寧。神得一以靈。爾若是神明。只合助道行化。何以惡聞神咒。我知非

白馬神。乃狐狸精。恠。傍附神祠。幻惑生靈。今日我決定於此。為民除害。遂志心。朗念神呪。至夜不歇。廟堂之上。寂然無聲。亦無光透簾幕。唯聞自撲呻吟之聲。至明。呼喚鄰近居人。眎之。唯見老野狐五頭。皆頭破血流。滿地而斃。自後寂然。無妖異。竟絕祭祀。廟宇荒廢。是知凡持此呪。勿得食蒜。至甚觸穢。天蓬將軍。是北帝上將。制服一切鬼神。故能誅滅妖恠也。

晉釋慧叡。冀州人。執節清峻。叅學遊方。至南天竺國界。殊方異典。無不洞曉。秦主姚興召見。睹其風韻含吐。即大激賞。稱為四海領袖。昔法護譯正法華受決品云。天見人。人見天。什譯妙法華至此。乃曰。此語與西域義同。但言過質耳。叡曰。將非人天交接。兩得相見。什喜曰。實然。其領解高出若此也。翻譯纔畢。命叡講之。叡乃品酌幽玄。開為九轍。一。昏聖相扣轍。即序品。二。涉教歸真轍。為上根人。三。興類潛彰轍。為中根人。四。述今通昔轍。中根領解。五。彰因進悟轍。為下根人。六。贊揚行李轍。即法師品。七。本迹無生轍。多寶不滅為本。釋迦不生為迹。本迹雖殊。不思議一也。八。舉因徵果轍。即湧出壽量品。九。稱揚遠濟轍。即隨喜品。已下讚經流通也。叡又著經序。

見大藏本經。又有二十八品生起。荆溪師稱大有眉目。師回向弘贊善利。願生西方。臨終之日。洗浴更衣。燒香禮拜。合掌向西坐卒。時見五色香雲從房而出。久之乃沒。

梁釋慧韶。年十二。出家具戒。遊京聽講。以義淺。乃聽開善藏法師講。遂覺理勝。當夕夢採得李子數斛。撮欲取之。先得枝葉。覺而悟曰。吾從學必踐深極矣。後梁武陵王鎮蜀。請於龍淵寺講。見一青衣神拜曰。願法師常在此弘法。當相擁衛。言訖而隱。後法化盛行。是年七月。告衆安坐而逝。

唐釋自覺。居平山重林院。為鬼神講說者三年。屢有祥感。常發四十八願。願因觀音大悲。接見阿彌陀佛。乃率衆建刹。鑄大悲像四十九尺。俯伏像前。陳其願曰。聖相已就。梵宇已成。願承聖力。早登安養。夜中忽見金色祥光二道。佛及菩薩左右隨之。佛垂手按覺首曰。守願勿易。利物為先。寶池生處。終當如願。後十一年。見天神雲中出半身。謂之曰。安養之期已至。即如像前跏趺而化。

唐梓州僧智通俗。姓陳。八歲出家。為正道法師弟子。專誦法華。并以講授。

住牛頭山。威儀奉戒。常有雙鵝來聽說法。講百餘遍。兩度放光。貞觀中。別衆而卒。合寺房堂。悉皆震動。變作白色。經一食頃。

唐漢澤縣李錄事立常。往餘法師所聽講維摩。時見一鬼。師問之曰。今講此經。感何人聽。答曰。自人頭已上。便是鬼神。上及諸天。重級充滿。然見諸天。聞法師酒氣。皆回面而聽。餘即悔過。不復飲。鬼又曰。非惟此會。獨感諸天。但有法事。無不來降。立常親獲見聞。遂筆記之。

隋釋貞觀。姓范。錢唐人。其母以誦藥師觀音求嗣得師。師以有節操。舌紫羅紋。手現奇相。誦法華經。日終一卷。從師聽律。超勝前輩。後於霽隱山建南天竺寺居焉。常講法華。以為心要。每盥洗遺滴。地不為濡。人皆異之。一日。臯亭神請講法華。感神捨祠為寺。有司馬李子深請講涅槃。至現病品。夢二人把旛告云。淨居天遣迎。續便卧疾。夢與智者同輦。翼佛還山。覺而嘆曰。昔謂六十二應終。講法華力。更延一紀。今七十四復致斯驗。生期畢矣。乃啓手足。時聞空中伎樂之聲。至于中夜。跏趺而寂。

唐僧鴻楚。永嘉人也。楚與昆弟器度宏遠。皆樂出俗。誦習蓮經。時大雲寺

荒墟音撫也昭宗勅重構締師主成之就而講習梁太祖賜紫衣師號師讓而不受師立性寬慈面無愠色目不邪視言不妄發講法華經至五十遍一時講堂忽生蓮花一朶重跗覆葉香氣芬芬音討榮也衆驟稱異又刺血寫是經一部永嘉世世寶之

隋僧法安止建元寺聽龍法師講博通玄要又長誦法華講四十餘遍忽於講座四角生華一叢有十餘枝黃白相間長五六寸狀似蓮華香光敷榮也藹常委切或者疑是蒸潤所生又過數日復於都講牀側及大衆坐處生八九華經一月方萎悴道俗聚觀咸言講經之瑞

隋僧惠向姓劉氏常誦法華經兼解深義後至淮陽江都止故亭村衆請講是經時年一百一歲顏色猶壯忽告衆曰吾其去矣言訖合掌端坐長往即瘞于銅山後樵人每於焚所聞誦經之聲一日司馬趙恪取道于傍顧見蓮花一朶驚問村人乃云是向師之塚恪乃令人掘之見白骨一聚唯舌宛然赤色其蓮根從舌生焉

隋僧灌頂總持生於章安吳氏始三歲時便能隨母稱三寶名時共驚異

因立小字名曰非凡。入道能日記萬言。晚止稱心精舍。長講法華。化流囂俗。神用無方。時有法龍村人。去山三十里。染患將絕。其子奔來求救。師爲轉法華經。焚旃檀香。病者遙聞香氣。即愈。樂安南嶺。地曰安洲。碧樹清溪。人徑不通。師往觀覽。留連不捨。乃發誓曰。若使斯地夷坦。吾當來此講法華經。曾未浹旬。白沙遍湧。平如玉鏡。師償先志。乃往講焉。又嘗於攝靜寺講涅槃經。值海寇劫掠。師撞鍾就講。賊入見兵旗耀日。持弓執戟人皆丈餘。因爾退散。師以貞觀六年於國清示疾。而室有異香。告弟子曰。彌勒經說佛入滅日。香煙若雲。汝多燒香。吾將去矣。言已而逝。

唐僧功迥。俗姓邊氏。六歲乞從佛。慈親奇之。口授觀音經。即通十六。遂其志。因入泰山事弘法師。迥曰。拱默山林。乃一途獨善。至於維持餘寄。非化誘不行。遂南叅止汴慧福寺。專以法華爲時要。撰疏五卷。鎮常講敷。每講至藥草喻品。天必降雨。人皆奇之。所講法華。始末計五十遍。兼講餘經。未易悉舉。後竟終於是寺。未終之日。乃有異香光明。迥覩之曰。願承此瑞。往生淨國。所飲井水。終時偶竭。殯經數日。水還彌滿。

宋僧淨梵。嘉禾人。姓竺氏。母夢光明滿室。見神人似佛。因而懷娠。生甫十歲。依勝果寺出家。祝髮從湛謙二法師學。教得其傳。初住無量壽院。凡講法華經十餘過。大觀中。結二十七僧脩法華懺。每期方便正脩。二十八日連作三會。精恪上通。感普賢受羯摩。華言法呼淨梵比丘名。聲如撞鍾。時長洲縣宰王公度親目其事。題石為記。又嘗夢黃衣人請入冥。見王者令檢簿云。淨梵比丘。累經劫數。講法華經。即遣使送歸。一日禪觀中。合衆皆見金甲神人。胡跪師前。又在他處懺期。蒙韋馱天點檢大衆中。有戒不嚴淨者。先以預定。後果懺法不全。時姑蘇守應公有婢為祟所惱。請師授戒。其妖即滅。葛氏請施戒薦夫。見夫遶師三匝而去。待制賈公睹師道行。即補為管内法主。師住持十餘年。亡後焚軀。有舍利五色。

唐僧法融。俗姓常。潤州人也。家世業儒。博通書史。然無經世意。一日偶閱般若。曉達真空。乃棄儒竄入茅山。改縫掖而披緇。探賸此道。二十年間。專精匪懈。貞觀中。於牛頭石室。為四衆百餘人講法華經。是時積雪滿階。忽於疑冰中現華二朶。狀似芙蓉。粲同金色。凡七日方隱。又宰公蕭元善請。

講般若。感大地震動。鍾磬香按。並皆搖颺。至於寺外。恬然不知。又劉禹錫作師塔碑曰。師之神功。感旱麓泉湧。皓雪蓮生。巨蛇摧伏。群鹿聽法。矧師住牛頭山。有百鳥銜花之供。時四祖信禪師。望彼山有瑞氣。訪之。果見公住菴。多有虎狼之跡。一言契悟。傳佛大法。自此應緣講經。皆致靈驗。

宋僧澄照。名覺先。世裔慈溪。姓陳。生而敏銳。脫素於精進院。師授蓮經。一讀成誦。披緇已後。首入延慶明智之室。復升天竺慧覺之門。切問近思。一家教觀。莫不洞曉。衆請住寶林院。法華三大部。聯環講貫。授道無虛日。靖康春。大旱。師對龍天講經。即為三日之霖。百里歡呼。道俗感其神異。為光明幢以表識之。次遷延慶法席。恢揚祖教。戶外屨滿。紹興八年。退歸寶林。作終焉計。師化導外。唯以法華為心要。日課未嘗輟。通誦一萬部。方丈向深處築室。號妙蓮堂。安住其中。彌陀經。復持四十七歲。正心淨業。可謂專注。後感微恙。為衆說法。安然而化。

宋朱仲振。居平江府虎丘寺前。寺中作佛會。衆皆來聽佛印禪師講演金剛般若波羅密經。朱因步入寺。見其男女分列兩廊。朱試聽間。師正說到

一切有為法。如夢幻泡影。如露亦如電。應作如是觀。解說極是分曉。朱聞其言甚喜。心中亦悔不早來。次日午時。朱在宅中偃息。似夢非夢。見一鬼使押六箇罪人。中一婦女。從門前過。朱隨其後行。次至一街巷。轉灣有青布簾家。鬼使引罪人揭簾而入。徑至其厨下。見竈上有桶。罪人盡用鐵杓。自桶內湯喫。朱亦飢渴。欲啗其湯。被鬼使喝一聲。喫。聽佛法之人不得喫。因此驚覺。追思夢中。尋至其地。果見青簾。朱詣其宅。見一婦與丈夫對飲。朱進揖。因說夢中所見。未委使宅厨下。有何影響。丈夫云。方見妮子來報。竈下雌狗生六箇狗兒。五雄一雌。朱大驚異。後詣謝佛印禪師。言其曲折。師云。汝喜得日前聽經之力。豈不見鬼使分明說破。聽佛法之人不得喫。汝若當時不聽得。山僧說此數句佛法。一時喫了桶內迷魂湯。陽間便放命。就入狗胎。化為畜生身矣。朱因師撥轉省悟。遂禮拜請得金剛經一卷。歸家受持。寒暑不輟。身體輕健。兩子雙補入太學。年八十九歲。忽發書請長老闔寺僧衆及道友。八月十五日。就家庭啟建金剛經會。會罷。朱請大眾入園內閑遊。行到後園有古松處。朱索紙筆作頌。身體漸漸騰空。徑上

捫梢枝上。辭謝大眾及眷屬等。立化而逝。

元建寧路劉屠。性狠。屠宰為業。一日侵晨持刀正於案上賣肉。有頭陀道者。沿路敲磬誦金剛經教化。至劉屠門前。正念應無所住而生其心一句。而劉屠若有所悟。頓下屠刀。合掌立化。

宋婺州僧道隆。雲遊諸方。寓江州能仁寺。所為不常。但呼為風和尚。紹興元年。行化抵瑞昌。投宿天花寺。夜夢男子垂泣。言弟子不幸。在生前廣造惡業。今墮牛身。一尾生於頭上。形模醜異。願師慈悲。為我懺悔。令脫此苦。明日至若山湯氏家。一門男女悉出作禮。啓告曰。前日牛產犢甚怪。尾出頭上。恐於寒家生灾。願和尚暢此因緣。以洗宿咎。須臾驅牛前來。掉頭搖尾。若乞憐狀。隆咄曰。汝昔者作業。茲日難逃。雖受此形。本性何異。豈不聞瀉山和尚示衆言。中有響。句裏藏機。汝若於斯會得。便見靈光動耀。照徹十方佛與衆生。本同一體。其或未然。當為作偈。即於坐成頌云。牛兒牛兒知不知。昨夜三更夢見伊。汝既殷勤求懺悔。吾當為汝說無為。牛兒牛兒知不知。掉尾頭中怨阿誰。緣汝生前貪愛重。致令今日落便宜。牛兒牛兒

知不知。本性何嘗有悟迷。拽轉頭來觀自己。頂門一竅鎮長熙。牛兒牛兒
知不知。擺尾搖頭更是誰。七佛祖師同此體。聖凡不隔一毫釐。牛兒牛兒
知不知。兀兀騰騰世所希。此去雪山田地穩。甘泉充渴草充飢。牛兒牛兒
知不知。佛祖難為正面窺。明月光中留不住。白雲影裏美蹄歸。受記纔畢
即隨隆歸能仁。觀者日以千數。牛見人俛首不食。為羞報態。寓客司馬述
亦作兩頌曰。六塵荒却自心田。受業貪情似索牽。當日眼睛隨物轉。如今
鼻孔被人穿。今朝撞着主人翁。彈指聲中業已空。從此鞭繩都放下。夕陽
江上卧秋風。歲除夜。牛忽殂。隆又夢來謝。遂領眾親為然炬焚之。且說偈
曰。正當臘月三十夜。荷汝殷勤來報謝。告言已得脫輪迴。更沒新冤并舊
債。牛兒子。真可恠。知汝罪大福亦大。罪大當頭挿尾巴。福大遇吾親說戒。
形類雖殊佛性同。便於言下能領解。從茲水草已忘食。平步雪山無狹隘。
贈汝一把三昧火。頭角及毛俱脫卸。本來面目露堂堂。光明照徹塵沙界。
說偈已。遂焚之。

隋蔡州蒯武安。有巨力。善弓矢。常射虎。會有在嵩山南為暴者。遂往射之。

漸至深山。忽有異物如野人。手開虎皮來冒武安身上。因推落澗中。及起已化為虎矣。惶怖震駭。莫知所為。忽聞鍾聲處。知是僧舍。因往求救。果見一僧正念金剛經。安但閉目。伺犬。其僧以手摩其頭。忽爆炸巨聲。頭裂破矣。安乃從中出。即述其事。又撫其背。隨手而開。既出。全身衣服盡在。唯背上。有少虎毛。蓋先有灸瘡處也。安從此出家。專持金剛經。

元邵武路松林平。於至元庚寅間。彼處起金剛經會。每雲集善人看經。羞饌齋飯。忽一日。有一屠人從門首過。不免駐足。看諸人誦經。時眾請歸裏面喫齋飯。屠人云。不敢進。我身不淨。休去擔罪。善人皆云。不妨。遂進來。飯罷。云。我不曾預會。反擾諸善人。後五日當捨一供。忽一日。有一人夢見有七八人成隊入人家去。見屠人也入其家去。云。是莫有善事。只見彼一人將屠人推出去。云。汝是金剛經會內之人。休得進此。至次日。省問。其一人家生九箇猪子。死了一箇。其屠人死去一夜再甦。

若迦羅池中。有一蛤兒。聞佛說法。即從池出。入草根下。是時一牧牛人。見眾圍繞聽佛說法。前詣佛。所欲聞法故。以杖刺地。誤着蛤頭。蛤即命終。生

忉利天尋即思惟我先為畜何因緣故生此天宮觀因於聽法得此果報時蛤天人即承宮殿往至佛所禮謝佛為說法得須陀洹果。

宋紹興初有鮑伍氏有新婦姓沈定海江南人稟性貞淑善果自脩其姑每旦誦蓮經婦則謹於事奉凡展卷則來聽受或一二品乃至一卷久而不倦一時感疾即白姑曰婆婆誦經新婦獲聽世緣告謝不及奉侍願他世諸佛會中相見漫成一頌乞傳之平生快活死也風流最後一着分付柴頭言已聳身加趺而殞迺姑見其超脫往白天童宏智禪師師聞讚善遂以己龕與之洎從火化餘骨中所謂堅固子者瑩然無數四眾見聞稱嘆希有。

唐并州石壁寺有一老僧禪誦為業精進練行貞觀末有鵠巢其房楹上哺養二雛法師每有餘食恒就巢哺之鵠雛後雖漸長羽翼未成乃並學飛俱墜地而死僧並收瘞之經旬後僧夜夢二小兒白之曰兒等為先有少罪遂受鵠身比來聞法師讀法華經及金剛般若經既聞妙法得受人身兒等今於此寺側十餘里某村某姓名家託生為男十月之外當即誕

育。僧乃依期往視。見此家一婦人。同時誕育二子。因為作滿月齋。僧呼為鵠兒。兩兒並應之曰。諾。一應之後。歲餘始言。

昔有一國。穀米湧貴。人民飢餓。時有沙門入城分衛。華言乞食。周遍門室。無所

一獲。次至長者家乞食。得麤惡飯。適欲出城門。中途一射獵屠兒。抱一狗

子。持歸欲殺。見沙門歡喜。前為作禮。沙門呪願老壽長生。沙門知有狗子。

疑欲殺之。故問其人。今何所賣。答曰。空行無所獲持。沙門又問。吾已見之。

何為藏匿。殺生之罪。甚為不善。願持我食。質此狗子。令命得濟。卿福無量。

其人答曰。不能相與。我故行求。家門共食。卿此小飯。何所足乎。沙門殷勤

曉諭請之。其人抵突不肯隨言。沙門又言。設不肯者。可以示我。其人即出

以示沙門。沙門舉飯以飼狗子。以手摩挲。音也。呪願淚出。卿罪所致。得是

犬身。不得自在。見殺食噉。使爾世世罪滅福生。離狗子身。得生為人。所在

遇法。三寶自然。狗子得食。善心生焉。踊躍歡喜。知自歸依。人將還家。屠殺

共食。狗子命過。即生豪貴大長者家。適生墮地。便有慈心。時彼沙門分衛。

次到長者門裏分衛。時長者子見彼沙門。憶識本緣。便前稽首禮沙門足。

請前供養百味飲食。前白父母言。今我欲逐此大和尚。奉受經戒。為作弟子。父母愛重。不肯聽之。我今一門有汝一子。當以續後家門之主。何因使欲棄家而去。小兒啼泣。不肯飲食。不欲聽我。便自就死。父母見然。便聽令去。隨師學道。除去鬚髮。被三法衣。諷誦佛經。深解其義。便得三昧。

昔佛在波羅柰國。於林澤中。為諸天世人演說妙法。時虛空中有五百群鴈。聞佛說法。心深愛樂。聚迴而翔。來下聽法。時有獵師張施羅網。五百群鴈墮其網中。為諸獵師都悉所殺。於此命終。生忉利天。忽自長大。如八歲兒。端正殊妙。諸天身光。明曜宮殿。猶若寶山。便自念言。我脩何福。得來生天。尋自觀察。知從鴈身。聞佛說法。心深信樂。乘此善心。即便命終。得來生此。便作是言。我等今者。當報佛恩。即共同時。頂戴天冠。着諸瓔珞。莊嚴其身。齎持香花。來詣佛所。供養世尊。供養已訖。頂禮佛足。却坐一面。白佛言。世尊。我等今者。蒙佛世尊演說妙法。信樂心生。得生勝處。唯願世尊慈愍我等。更為重說。開示道要。爾時世尊。即便為說種種法要。心開意解。五百天人。一時皆得須陀洹果。心懷歡喜。繞佛三匝。頂禮佛足。還詣天上。

昔佛在舍衛國祇樹給孤獨園時彼城中有一婆羅門華言淨行其所營務耕

田為業於其匹對聘以為婦足滿十月生一男兒名曰月光年漸長大與

須達華言善施兒出外觀看到僧坊中見諸比丘勤加誦習時婆羅門兒即便

得聞一四句偈深生敬信即還歸家却後七日即便命終生忉利天

昔鶴勒那名僧問二十二祖摩拏羅大士曰我有何緣鶴眾隨我祖曰汝昔

嘗為比丘赴會龍宮汝弟子眾咸欲隨從汝觀五百眾中無有一人堪受

妙供時諸弟子曰師嘗說法於食等者於法亦等今既不然何聖之有時

汝即令其眾赴會是諸弟子福薄德微墮於羽族然已五劫今乃轉受鶴

身曰以何方便令彼解脫祖曰我有無上法寶汝當聽受化未來際而說

偈曰心隨萬境轉轉處實能幽隨流認得性無喜亦無憂時諸鶴眾聞偈

俱得解脫飛鳴而去

昔佛在世時有一比丘林中誦經音聲雅好時有一鳥聞法敬愛在樹而

聽時為獵師所射命終緣此善根生忉利天面貌端正光相眊然無有倫

匹自識宿命知因比丘誦經聽法得生此中即持天華到比丘所禮敬問

訊以天香華供養比丘。比丘具問。知其委曲。即命令坐。為其說法。得須陀洹。既得果已。還歸天上。禽鳥聽法。尚獲福報。豈況於人。信心聽法。寧無善報。

昔有沙門。晝夜誦經。有狗伏牀下。一心聽經。不復念食。如是積年。命盡得人身。生舍衛國中。作女人。長大。見沙門分衛。便走自持飯與沙門。沙門歡喜。後作比丘尼。應得真道。

昔佛在世時。舍衛國中。須達長者。信敬佛法。為僧檀越。施主。眾僧所須。一切供給。須達家內。有二鸚鵡。一名律提。二名賒律提。稟性黠慧。解人言語。見比丘來。先告家內。令出迎送。阿難後時到長者家。見鳥聰黠。為說四諦。苦集滅道。門前有樹。二鳥聞法。飛向樹上。歡喜誦持。夜在樹宿。野狸所食。緣此善根。生四王天。彼天壽盡。生夜摩天。夜摩壽盡。生兜率天。兜率壽盡。生化樂天。化樂壽盡。生於第六他化自在天。他化壽盡。還生化樂。如是次第。還復下至四天王天。四天壽盡。還復上至他化自在天。如是上下。經於七返。生六欲天。自恣受樂。極天之壽。而無中天。後時命終。來生人中。出家。

脩道得辟支佛。

宋圓照本禪師住淨慈日。民張氏有女子死。夢其母曰。我以罪為蛇。既覺得蛇於棺下。持以詣本。乃為說法懺罪。復置故處。俄有黑蟬翔棺上。而蛇失所在。母祝曰。若是我女。當入籠中。當持汝再詣淨慈。如其祝。本復為說法。其母是夕夢女曰。二報已解脫矣。

宋左街都監道士賈善翔。嘗至太清宮。眾請講度人經。至說經二遍。盲者目明。時會中有媪年七十餘。喪明已三十年。一聞經義。豁然目明。至醮之夕。夢眾靈官傳太上命。為具仙服。為太清宮主者。數日返真。張商英作真遊記。備載其事。

梁武帝皇后郗氏崩後數月。帝居寢殿。見后祈求功德。帝聞之感激。明日大集沙門於殿庭。宣其由。誌公對曰。唯禮佛懺滌。愀歎方可。帝乃然其言。搜索佛經錄其名號。兼親撰悔文。共成十卷。皆采摭佛語。削去閑詞。為其懺禮。又一日。聞宮室內異香馥郁。良久轉羨。初不知所來。帝因仰視。乃見一天人容儀端麗。謂帝曰。蒙帝功德。已得生忉利天。今呈本身。以為明驗。

也。慇懃致謝。言訖不見。

宋僧道深。號圓辯。為南湖八世祖。於彌陀懺宴坐中。見法智尊者。於法華懺中。見普賢放光。每月二十三日。建淨業會。以為常課。道俗俱至。一日示疾。願平曰。一毫之善。回向淨土。集眾諷觀音經。不絕。七日。謂首座曰。吾已見佛身。聞異香。乃沐浴更衣。書偈曰。唯心淨土。本無幽悟。一念不生。即入初住。復令諷安樂行。至深入禪定。見十方佛。塔然而化。

宋襄陽天仙寺。在漢江之東津。去城十里許。正殿大壁。畫大悲千手眼菩薩像。世傳唐武德初。寺尼作殿求良工圖繪。有夫婦携一女子。應命。期尼以扁殿門。七日乃開。至六日。尼頗疑之。乃闢戶。聞其無人。有二白鴿。翻然飛去。視壁間聖像已成。相好竒特。非世工所能。獨其下有二長臂。結印手未足。乃二鴿飛去之應也。郡有畫工武生者。獨能摹傳其本。大觀初。有梁寬大夫。寓居寺中。心無信向。頗輕慢之。武生云。菩薩之面。正長一尺。寬以為誕。必欲自度之。乃升梯。欲以尺加菩薩面。忽梁間有聲如雷。寬震悸而墮。損其左手。僧教寬悔過自懺。後歲餘。方如舊。茲禦侮於像法事者。怒其

慢瀆耳。

梁小莊嚴寺在建康定陰里。本是晉零陵王廟地。天監六年。杯渡禪師起造。時有鄒文立者。世以烹屠為業。嘗欲殺一鹿。鹿跪而流涕。以為不祥。即加剗剖。鹿懷一甕。尋當產育。就庖哀切。有惻害心。因斯患疾。眉鬚皆落。身瘡並壞。因生慙愧。深起悔責。乃求杯渡禪師。發露重懺。立大誓願。罄捨家資。迴買此地。立為伽藍。華言衆也。謂僧寺也。尋夢神人語曰。以汝悔過造寺。鹿得託生。汝疾從此愈矣。

隋僧法喜。常行方等禮懺。有一雉來索命。神人斥之曰。法師當往生淨土。豈償汝命。後於病中發願。以一生所脩行業。回向淨土。至心念佛。即見佛菩薩衆來迎。端坐而化。

宋僧淨觀。居嘉禾寂光菴。脩淨土懺法十餘年。謂弟子曰。我後月二十七日當去。至兩日前。見紅花。次日黃花滿室。皆有化生孩兒。仙帶結束。及期入龕坐。命衆誦經念佛。頃之即脫去。

宋陸氏宜人。家錢唐。朝請王璵妻。常誦法華。晚年篤意淨土。禮懺一會。念

佛萬聲。凡三十載。因微疾。忽聞天鼓自鳴。人方驚異。即面西端坐。兩手結印而化。

宋秦氏淨堅。家松江。厭惡女身。與夫各處。精持齋戒。閱華嚴法華。光明般若經。無虛日。晨昏脩彌陀懺。日禮佛千拜。久之。有光明入室中。面西念佛。安坐而化。

宋李思一。暴死。經日。乃蘇。言見冥官云。汝年十九時。嘗害生命。一曰在安州。旻法師會下聽涅槃。何緣於彼相害。官追旻師。有荅旻生金粟界。不可追。且放還家。即甦。有僧元通。為禮佛懺悔罪愆。至晚又死。明日還蘇。云冥官喜曰。還家太作福德矣。又旻師遣僧來說。思一此時不曾殺害。遂即放還。

宋僧法宗。依雷峯廣慈學教。用止觀行法。脩大悲懺。至九載。然五指供佛。每月率四十八僧。同脩淨土懺。久之。夢佛菩薩來迎。後三日。乃合掌西望而逝。

宋僧法持。居化度寺。脩彌陀懺三年。燼二指。增受戒法。造西方三聖像。誦

觀經。彌陀經。如意輪呪。願促閻浮之壽。早生安樂之邦。一日小疾。哭慟懇告。願垂接引。念佛之聲。聞於百步。忽見佛身丈六。立于池上。即自言曰。我已得中品生。端坐面西而化。

宋僧本如。號神照。住東山承天三十年。講經之餘。集百人脩法華懺。又嘗與郡守章郇公結白蓮社。一日升座說法。與衆訣別。江上漁人見雲端有僧西去。明年啓塔。尊容如生。有蓮花產于塔前。

晉僧帛法橋。是中山人。少樂轉讀。而稍乏聲。每以不暢為慨。於是絕粒懺悔。七日七夕。稽首觀音。以祈現報。同學苦諫。誓而不改。至第七夕。便覺豁然。即索水洗漱。云吾有應矣。於是誦三契經。聲徹三里許。遠近驚嗟。人畜悉來觀聽。尔後誦經五十萬言。晝夜諷詠。哀婉通神。至年九十。聲猶不變。以永和中卒於河北。

宋僧師安。受業烏鎮普靜。通華嚴宗旨。脩彌陀懺。觀想淨土。二十年所。夕不廢。一生多病。臨終忽精爽。謂弟子曰。佛菩薩已降。吾將行矣。言訖。即端坐而化。

唐懿宗朝。有悟達國師。知玄者。未顯時。嘗與一僧邂逅於京師。忘其所寓之地。其僧乃患迦摩羅疾。癰疽衆皆惡之。而知玄與之為隣。時時顧問。畧無厭色。因分袂。其僧感其風義。祝之曰。子向後有難。可往西蜀彭州茶壘山相尋。其山有二松為誌。後悟達國師居安國寺。道德昭著。懿宗親臨法席。賜沉香為法座。恩渥甚厚。自爾忽生人面瘡於膝上。眉目口齒俱備。每以飲食餽之。則開口吞啖。與人無異。徧召名醫。皆拱手默默。因託昔日同住僧之語。竟入山相尋。值天色已晚。徬徨四顧。乃見二松於烟雲間。信期約之不誣。即趨其所。崇樓廣殿。金碧交輝。其僧立於門首。顧接甚歡。因留宿。遂以所苦告之。彼云無傷也。巖下有泉。明旦濯之。即愈。黎明童子引至泉所。方掬水間。其人面瘡遂大呼。未可洗。公識達深遠。考究古今。曾讀西漢書。袁盎見錯傳。不曰曾讀。既曾讀之。寧不知袁盎殺晃錯乎。公即袁盎。吾即晃錯也。錯腰斬東市。其冤為何如哉。累世求報於公。而公十世為高僧。戒律精嚴。報不得其便。今汝受賜。賚過奢。名利心起。於德有損。故能害之。今蒙迦諾迦尊者。洗我以三昧法水。自此以往。不復與汝為冤矣。悟達

聞之凜然。魂不住體。連忙掬水洗之。其痛徹髓。絕而復甦。自此其瘡遂愈。乃知聖賢混跡。非凡情所測。再欲瞻敬。回顧寺宇。不可復見。因卓菴其所。遂成招提。迨於宋朝至道年中。賜名至德禪寺。有高僧信師古作記。紀其事甚詳。悟達當時感其殊異。深思積世之冤。非遇聖人。何由得釋。因述為懺法。朝夕禮誦。後傳播天下。今之懺文三卷者。乃斯文也。蓋取三昧水洗冤業為義。命名曰水懺。此悟達感迦諾迦之異應。正名立義。報本而為之云耳。

隋陳鍼。智者之兄。為梁晉安王中兵參軍。年四十。仙人張果相之曰。死在朞月。遂行脩懺。鍼見天堂門牌曰陳鍼之堂。後十五年。當生於此。果後見鍼。驚問曰。君服何藥。荅曰。但脩懺耳。果曰。若非道力。安能超死。竟延十五年而終。智者嘗為其撰小止觀。咨受脩習。夙夜不怠。

隋東川釋慧曇。辯聰令逸。大小通明。住寶明寺。襟帶衆經。以四月十五日。臨說戒時。僧並集堂。曇居上首。乃白衆曰。戒本防非。人人誦得。何勞徒衆。數數聞之。可令一僧豎義。令後生開悟。曇氣岸風格。當時無敢抗者。咸順

從之。自結夏以來。嘗廢說戒。至七月十五日。將昇草座。失曇所在。大衆以斯歲未受。交廢自恣。一時崩騰。四出追覓。乃於寺側三里許。於古塚間得之。遍體血流。如刀割處。借問其故。云有一丈夫。執三尺大刀。厲色瞋曇。改變布薩。妄充堅義。刀膾身形。痛毒難忍。因接還寺。端情懺悔。乃經十載。說戒布薩。讀誦衆經。以為常業。臨終之日。異香迎之。神色無亂。欣然而卒。屢示嘉祥。

梁楊都宣武寺沙門法寵。姓馮。南陽冠軍人也。年三十八。正勝寺法願道人。善通樊許之術。謂寵曰。君年滿當死。無可避處。唯祈誠諸佛。懺悔先愆。排脫或可冀耳。寵因引鏡驗之。見面有黑氣。於是貨賣衣鉢資餘。併市香供。飛舟東逝。直至海鹽。居光興寺。閑房禮懺。杜絕人物。晝忘食息。夜不罷衣。迄至四十歲暮之夕。忽覺兩耳腫痛。弥生怖恐。其夜懺達四更。聞戶外有人言曰。君死業已盡。遽即開戶。都無所見。明晨偕閭僉言。黑氣都除。兩耳乃是生骨。斯實由懺蕩之殷。故致延壽也。以普通五年三月十六日卒于所住。春秋七十有四。

齊竟陵王崇信內典。得熱病。夜中垂死。夢見金像。手灌神湯。因遂平復。

元至正庚子。定海白沙夏太三。以運糧如大都。溺海死。後十六年。當

國朝洪武乙卯。其妻陳氏與子善追念太三。性稟酷暴。馭下少恩。死於非命。孤魂沉滯。曷由昇濟。遂歛資來鄞之十字港菴。嚴設道場。延淨行僧十人。請叶萬宗主之。脩禮梁皇懺法。陳氏虔懇至。初入道。衆聽敷陳。無不感泣。是日禮二卷。至中夜少就寢。有僧宜便忽驚呻寐語。撼之不寤。惟見其多辛苦憂怖狀。於是萬宗等懼其不甦。悉起持呪。良久疾呼之。乃甦。問故。惟泣而已。再問。乃言曰。有神人若韋天冠帶甚嚴。逼令我同取夏太三來此受薦。道經蟹浦。神威凜凜。行者遠避。備歷諸險。臨大海見鬼物戢戢充滿大海。可怖。神人命我入海提挈太三。太三首戴元帽。浮沉波浪間。既難着手。又有神勒要我錢。乃放適有錢在我手中。與之。又盡力扶太三將登岸。被汝等喚省。言訖又泣。蓋苦於涉歷。然懺罪薦亡。無出此懺之功。

國朝主興為都指揮僉事。家北京篤於好善。崇信佛法。常持誦真言。洪武二十八年七月卧病二十餘日。忽見二使者來。一鬚鬢班白。一年少。呼興

而告之曰。王有命召汝。興但覺奮然而起。隨二人往。行既久。遇已死老達。扭詒呼之不應。始知已身亦已死。而精神如舊。復行。見路傍蘆蓬下。排列紅卓。上有諸品果肉菜。亦有歌舞者。衆相率來迎。舉酒勸興飲。興辭。其二使者亦却之云。菩薩不飲。不必苦勸。衆皆慟哭煩惱。如是迎者凡三。又到一大城門。三重皆裹以鉄葉。入城。見往來者不絕於道。皆用銅錢交易。亦有人家舍宇。一河橫亘東西。河之南有荷磚甃河岸者。有一男子偃卧于河北水邊。東首。蛆食其體。筋骨皆露。猶欲飲水狀。興問使者曰。此人口邊即有水。何以不能就飲。老使者荅云。彼乃陽間一大財主。所享皆美飲食。餘者寧棄之不肯施與貧困之人。故受此惡報。興又問此人經幾時矣。老使者荅云。已歷五百年。不曾得水飲。興又問何時可托生。老使者荅云。再經四五百。年。不得托生。興復行。進一王城。見綠琉璃殿。前有紅漆橋三座。興由西邊橋到殿上。侍衛者皆帶弓箭。繖扇左右遮擁。前有大香爐一。興行四拜禮畢。舉首望之。繖扇下微露衣裾。老使者云。令爾去見王。特過東廂。復有綠琉璃殿。見五王皆衣青衣。鬚髮斑白。列坐殿上。興即拜。目一

王云不須拜。菩薩爾來何為。興打一問訊云。王差人召我來。王云誤召爾來。即索簿書閱之。謂興云。爾復有三十二年陽壽。可速回。興因問云。我再來時居於何處。試觀之。王語興云。菩薩居處在南邊寺裏。興即到寺中。見一長老。興四拜求攝受。見湯飯各一桶。往來人食之不盡。興問長老。此飯與湯往來人食不盡。其故何如。長老云。爾不能知。此是聖境之處。興別長老。欲詣王相別。二使者不許。興直造王前。一王謂興云。菩薩爾何以不回。興云。我來見王。因問陽間常傳有十王。我但見五王。其五王復在何處。王云。爾所問良是。五王在上方。彼下降。則我五王當上昇。呼左右急索茶與菩薩飲。茶至。五王各飲一鍾。以一鍾與興。興受而不飲。王云。爾不飲。固是。但我所與茶。飲之無妨。興隨飲訖。腹中便覺清涼。王又云。爾速回。就此相別。謂二使者云。爾二人還送菩薩回去。使者即引興復從原路回。向所見三處。蘆蓬下羅列酒肴如舊。勸興食之。興不食。只與二使者食之。行經通州南門口。過到東嶽廟前。認是樞密院轉角。過來到家。二使者不肯進。興拽其衣云。爾隨我。二三日勞甚。與爾茶飯及草鞋錢去。興令其在門外候。

興進門見燭明。家人輩俱慟哭。隣家長幼群聚。並不見興。興見己身在牀。試推之。體硬不可動。復撥開双眼。興就入己身。氣息漸出入。聞妻呼長幼云。爾衆人不必哭。他已回。必索何物。興即云。可取湯來飲。湯至。飲不下咽。興云。二人候于外。可取酒二甌。肉二臠。飯二椀。紙錢二束。與之燒紙訖。飯湯俱潑於地。興復索湯飲之。即下。却云。我回時日早暮。家人輩云。已三更。興云。正午時到家。爾輩何以云三更。自此病即愈。





